




**Wea nao Stret Rod?**



# Wea Nao Stret Rod?

*Wan stori we Jon Banyan i raetem long Inglis  
“Pilgrim’s Progress”*



SKRIPJA YUNYON VANUATU  
VANUATU BAEBOL TRANSLESEN

Port Vila, Vanuatu

# Wea Nao Stret Rod?

Jon Banyan

Copyright ©1985 Christian Books Melanesia Inc

Pictures by Graham Wade used by permission

Published by:

Scripture Union Vanuatu  
P.O. Box 379  
Port Vila  
Vanuatu

Vanuatu Baebol Translesen  
P.O. Box 174  
Port Vila  
Vanuatu

First Bislama edition – 2011  
1500 Copies

Cover design: Ben Paschke

website: [www.scriptureunionvanuatu.com](http://www.scriptureunionvanuatu.com)  
email: [admin@scriptureunionvanuatu.com](mailto:admin@scriptureunionvanuatu.com)

## Tangkiu Toktok

Tok tangkiu i go long olgeta long Moody Press Blong America blong letem mifala i transletem buk ia, “Pictorial Pilgrims Progress” blong givhan long mifala blong mekem “Wea Nao *Stret Rod?*”

Ruth Blowers i bin wokem buk ia faswan long 1971 mo hem i faenem i had tumas blong tanem stori ia i kam long Tok Pisin mo blong mekem stori ia i kam klia insaed long fasin blong ol man Papua New Guinea. Wan narafala man, we nem blong hem Ces Parish i bin givhan long hem. Afta, long 2009, Lilian Navaika i tanem ol toktok blong storian ia i go long Bislama blong ol man Vanuatu i save ridim. Lyndal Webb hem tu i bin givhan blong raetem long Bislama. Mo i gat plante narafala man bakegen we oli givhan blong mekem stori ia i kam klia moa long Bislama. Tangkiu i go long Serah, Leisis, Monique mo Ross (olgeta blong VBT), mo tangkiu long Christina, Liana, Jim, Ann, Netty, Ben, Lyndell mo Jon (olgeta blong SUV).

Graham Wade blong Pilgrim International long Sydney Australia, hem i bin mekem ol gudfala pija mo hem i glad tumas blong mifala i yusum blong putum i go insaed long buk ia.



# Histri blong Jon Banyan

---

Stori ia hem i bin wan drim blong Jon Banyan we hem i drim se i gat wan man i wokbaot long *Stret Rod* blong go kasem Heven. Stamba blong Stori ia i olsem:

Long yia 1600 Jon Banyan i stap long kantri ia England. Hem i wan pasta blong wan jos be hem i no folem ol fasin we ol narafala jos i mekem, mo long taem ia hem i no folem fasin we King Jemes blong England i mekem. King i bin harem sam toktok se Jon Banyan i no stap folem fasin blong hem, mekem se hem i kros tumas mo i putum hem long kalabus. Jon i no bin stap long kalabus sot taem. Nogat. Hem i bin stap long kalabus blong twelef yia.

Long taem we Jon Banyan i stap long kalabus, hem i stap harem nogud from ol rabis fasin we oli stap mekem long hem. From samting ia hem i stap ridim Baebol evri dei mo Tabu Spirit i givim paoa long hem. Jon Banyan i gat woman blong hem mo tufala i gat wan pikinini. Be woman blong hem wetem pikinini blong hem tufala i stap hanggri. Mo taem Jon i harem samting ia hem i harem nogud tumas.

Nao hem i mekem prea afta i raetem wan leta i go long woman blong hem wetem ol man blong jos, blong leftemap tingting blong olgeta. Long leta ia hem i talemaot drim blong hem we hem i wan longfala stori.

# 1 I gat wan man we i stap karem wan bag we i hevi we i hevi

Nao long drim blong hem, hem i bin luk wan man i stap, mo ol klos blong hem i olfala mo oli brokbrok. Mo man ia i stap tanem bak long ples blong hem mo i stap wokbaot i go. Mo hem i stap holem wan Buk nao i stap ridim wan toktok we i stap long Buk ia. (Aesea 64:6) Mo ol toktok ia i mekem hem i harem nogud tumas, i mekem se hem i krae we i krae tumas mo bodi blong hem i slak we i slak. Mo i singaot bigwan se, “Naoia bae mi mekem wanem?” (Ol Wok 2:37)

Man ia i harem nogud tumas mekem se hem i go long haos blong hem i sidaon mo i stap tingting plante. Mo tu hem i no wantem se woman blong hem, mo ol pikinini blong hem bae oli save se hem i stap harem nogud. Hem i bin harem nogud tumas long toktok we hem i ridim from we ol toktok ia oli stikim hem tumas i mekem hem i no save fogetem. Harem nogud ia i stap long hem longtaem tumas i mekem tingting blong hem i no stap kwaet.

Hem i harem nogud gogo nao hem i ting se i mas talemaot harem nogud ia long woman mo ol pikinini blong hem. Nao i talem long olgeta se, “Mi mi stap harem nogud long wan samting ia. Mo samting ia i holemtaet mi mo mi no save lego nating. Tingting ia we mi stap trabol long hem i stat long taem we mi ridim Buk, mo Buk ia i tok long mi se bae wol ia i lus. Mo bambae faea i kamaot long Heven i kamdaon mo i bonem evri samting. (Rev 20:9) Mo faea ia tu bae i bonem yumi evriwan. (Luk 13:3) Be mi mi wantem faenem wan rod we bambae mi no bon long faea ia, be bae mi laef nomo.”

Taem we woman blong hem mo ol pikinini blong hem oli harem toktok ia oli kros tumas long hem from we olgeta oli no fraet nating long faea ia we hem i stap talem long olgeta. Be ol famle blong hem oli ting se papa i lusum hed. Be nating we ol famle blong hem oli tingting olsem be hem i gohed nomo blong talemoot ol toktok ia we hem i ridim long Buk ia.

Afta, waef blong hem i talem long hem se, “Ating i gud yu slip fastaem. Maet taem yu girap bae yu kam gud bakegen.”

Be taem we man ia hem i traem blong slip, hem i no save slip nating. From we tingting blong hem i trabol tumas long ol toktok we hem i bin ridim long Buk ia, i mekem hem i fraet tumas. Nao i stap krae bigwan. Mo long moning taem hem i girap, waef blong hem i wantem save se man blong hem i harem gud o hed blong hem i lus yet. Nao hem i askem long hem se, “Olsem wanem, yu harem gud nao?”

Be hem i talem se, hem i harem se tingting blong hem i kam hevi moa i bitim yestedei. Nao hem i stap tokbaot bakegen wanem we hem i bin ridim long Buk ia. Plante taem hem i stap talem ol sem samting nomo i go long famle blong hem. Oli harem gogo oli les, mekem se oli blokem sora mo oli tanem bak blong olgeta long hem. Afta oli stap laf long hem, we semtaem oli stap kros mo oli agensem hem. I mekem ol famle blong hem oli nomo laekem hem. Mo oli no moa wantem kam sidaon wetem hem long faea from oli no wantem harem ol toktok blong hem. Fasin ia we ol famle blong hem oli mekem long hem, i mekem hem i harem nogud moa. Harem nogud blong hem ia i mekem se hem i stap go aot long haos blong i go prea.



Nao long wan taem, hem i go wokbaot long bus blong tri dei we i no kam kamaot long haos nating. Taem hem i stap long bus i stap ridim Buk mo i stap prea. Be harem nogud blong hem ia i no kamaot long hem nating. Mekem se hem i krae mo i singaot bigwan se, “Bae mi mekem wanem nao?”

Hem i stanap i lukluk olbaot mo tingting blong hem i stap wok tumas nao hem i stap tingting se bae hem i ronwe, be hem i no save se bae hem i folem wanem rod.

## **2** *Ivanjelis* i soemaot laet long man ia.

Taem man ia i stap lukluk olbaot hem i luk wan man i stap wokbaot i kam klosap long hem. Nao man ia i talem long hem se, “Mi nem blong mi *Ivanjelis*.”

Nao *Ivanjelis* i askem long hem se, “Ei, be yu stap krae from wanem?”

Afta hem i ansa i se, “Brata, mi bin ridim wan Buk ia. Mo Buk ia i talem se bae wan dei mi mi mas ded. Mo afta long ded bae mi mas pas long kot blong oli jajem mi. Be mi mi no wantem ded ia. From we mi mi fraet blong pas long kot”. (Hibrus 9:27)

Nao *Ivanjelis* i talem long hem se, “Long wol ia, bae i gat fulap samting we oli save spolem yumi. Be from wanem yu no wantem lego harem nogud blong yu?”

Nao man ia i ansa long hem se, “Ol toktok we mi ridim long Buk ia i stikimgud mi, mekem se harem nogud blong mi ia i nogud we i nogud tumas. Mo mi mi save se ol nogud blong mi ia bae i mekem mi mi bon long faea nomo.”



*Ivanjelis i soem rod blong Kristen i folem*

Afta, *Ivanjelis* i talem long hem se, “Yu save se yu gat bigfala trabol long laef blong yu, be from wanem nao yu stap long ples ia?”

Mo man ia i talem se, “Wanem rod nao bae mi folem blong livim ol trabol blong mi?”

Nao taem we *Ivanjelis* i harem tok ia, hem i karemaot wan pepa we toktok blong Buk ia i stap long hem, mo i givim long hem. Mo tu *Ivanjelis* i givim wan ki long hem, we nem blong ki ia hem i *Promes* (Hibrus 4:1). Long pepa ia oli raetem wan toktok olsem, “Yu mas aot mo folem wan

gudfala rod we yu no save mekem God i kros long yu.” Taem we hem i ridim pepa ia hem i talem long *Ivanjelis* se, “Be bae mi aot mi go long wanem ples?” (Sam 139:7)

Nao *Ivanjelis* i poenem wan haos long hem we i stap long wei mo i talem se, “Yu luk haos ia long wei, mo yu luk se i gat wan smol doa i stap long fanis ia? (Matiu 7:13,14)

Nao hem i ansa i se, “No, mi no luk.”

Mo *Ivanjelis* i talem se, “Be yu luk se i gat wan laet i stap laet?” (2 Pita 1:19)

Hem i ansa i se, “Ah, mi no save. Ei, be yu wet, mi luk olsem wan laet i stap saen ia.”

*Ivanjelis* i toktok i se, “Oraet, yu folem gud laet ia mo bae yu kasem wan doa. Taem yu kasem doa ia, yu kilkilim mo yu wet. Ale, wan man bae i kam blong soemaot rod blong yu folem.”

Taem we man ia i harem tok blong *Ivanjelis* hem i ron i go kwiktaem nomo long *Stret Rod* ia. Hem i stap ron i go, be woman mo ol pikinini blong hem oli singaotem hem blong hem i kambak. Be papa blong olgeta i no lisin long olgeta be hem i singaot long olgeta i se “Ei, mi mi wantem kasem laef ia we i no gat en blong hem, mo mi mi save kasem.” Hem i talem olsem afta hem i no moa lukluk i go bak long ples blong hem, be i ron nomo i go folem *Stret Rod* ia we laet i saen long hem. (Jenesis 19:17) Nem blong man ia hem i *Kristen*.

### 3 Kristen i no wantem go bak long sem ples blong hem.

Ol famle blong Kristen oli kam blong luk hem, be hem i ron nomo i go. Be oli stap laf jikim hem, mo oli wantem mekem hem i fraet. Be sam narafala man oli stap singaot i go long hem blong hem i mas kambak. Be hem i no wantem kambak, nao tu man i ron folem hem blong holem hem. Nem blong wan long tufala man ia hem i *Stronghed*, mo nem blong narafala man hem i *Sofsof*.

Tufala i ron i go kasem Kristen mo Kristen i askem long tufala man ia se, “Ei tufala, from wanem yutufala i stap folem mi?”

Tufala i ansa se, “Mitufala i kam from yu blong yumi go bak.”

Be Kristen i ansa long tufala i se, “Yutufala i no save wanem we mi mi stap mekem. Ples blong yutufala oli singaotem se *Nogud Ples*. Mo sipos yutufala i stap long ples ia, bae faea i bonem yutufala wetem ol man ples mo evri samting blong yufala.”

Afta Kristen i talem long tufala i se, “Ating i gud blong yutufala i lego ples blong yutufala mo kam wetem mi.”

Be *Stronghed* i toktok i talem se, “Kas, be yu olsem wanem ia? Yu yu ting se bae mitufala i lego papa mo mama mo ol garen blong mitufala?”

Be Kristen i talem se, “Be sipos yutufala i lego ol samting ia i gud. Yutufala i bin joenem sam fren blong yutufala we fasin blong olgeta i nogud, i mekem yutufala i stap mekem

ol fasin we i no stret. Mi stap luk ol fasin ia mo mi no laekem, mekem se mi mi wantem se ol fasin ia bae i no moa stap long mi blong bae mi harem gud. Mo tu mi wantem se bae mi nomo save fraet long ol nakaemas. Mo mi mi wantem kasem ol gudfala samting we oli stap long Heven. (2 Korin 4:18) Nao sipos yutufala i wantem folem mi, mo lego *Nogud Ples* ia bae i gud tumas. From sipos mi gat ol gudfala samting, bae yutufala tu i save gat.”

Nao *Stronghed* i askem long Kristen se, “Be yu stap lukaotem wanem samting ia? Yu wantem lego ol samting blong wol ia blong yu kasem wanem kaen samting?”

Afta, Kristen i talem se, “Mi wantem kasem laef ia blong Heven, mo mi wantem stap long wan ples we i no save nogud samtaem. From we Heven hem i wan gudfala ples mo bae i stap olwe nomo, i no save lus. (1 Pita 1:4) God i putumgud ol gudgudfala samting ia mo i talem se oli blong ol man blong hem. Nao sipos wan man i wantem tumas blong kasem gudfala laef ia, bae hem i save kasem. Yutufala i luk Buk ia, sipos yutufala i karem mo ridim, bae yutufala i faenem wanem nao mi stap tokbaot.”

Be *Stronghed* i toktok i talem se, “Mi no wantem ridim Buk ia. Be yu harem mi! Bae yu folem mitufala i gobak o olsem wanem?”

Nao Kristen i ansa i se, “No, from se naoia mi mi rere finis blong go. Mo mi mi no wantem lukluk i go bak, be bae mi wokbaot i go nomo.” (Luk 9:62)

*Stronghed* i toktok i go long nara fren blong hem se, “Yu kam, yumitu go bak long ples blong yumitu from man ia i lusum hed blong hem, nao hem i stap talem ol kaen toktok

olsemia. Mo hem i ting se hem nao i save evri samting i bitim ol narafala man!”

Be *Sofsof* i talem long *Stronghed* se, “Yu no kros long hem olsem ia. Kristen hem i wan gudfala man ia. Mi luk olsem se ol tok blong hem i tru ia, i mekem se mi tu mi wantem folem hem.”

Nao taem *Sofsof* i toktok olsem ia, *Stronghed* i kros tumas mo i talem se, “Ei, be yu yu olsem wanem bakegen ia? I gat wan moa krangke man i joenem Kristen. Ating i moa gud blong yu kambak wetem mi. From Kristen bae i soem wanem rod bakegen ia long yu? Yu kambak wetem mi



*Kristen i askem Sofsof mo Stronghed blong kam wetem hem*

nomo. I nogud se hed blong yu bae i krangke bakegen olsem Kristen.”

Be Kristen i holem han blong *Sofsof* mo pulum hem blong i folem hem mo i talem se, “Yu kam. I nogud yu go bak wetem hem. From toktok ia blong Heven hem i tru. Sipos yu no bilivim ol toktok we mi bin talem long yu, i moa gud yu ridim Buk ia. From man ia we Buk ia i tokbaot hem, blad blong hem i ron from yu mo mi.” (Hibrus 9:20 - 22, 26)

Ale, *Sofsof* i talem long *Stronghed* se hem i wantem folem Kristen, from hem tu i wantem lego ol sin blong hem. *Sofsof* i talem long Kristen se, “Rod we yu stap talem ia, bae yu save faenem o no?”

Afta Kristen i ansa i se, “Wan man we nem blong hem *Ivanjelis* i bin soem wan rod we i go kamaot long wan smol doa long wan fanis. Mo taem we bae yumitu kasem ples ia bae yumitu kilkilim doa, afta bae wan man i soem rod long yumitu.”

Ale, *Sofsof* i talem se, “Ah, be hem i gud tumas. Yumitu go.”

Ale *Stronghed* i talem se, “I oraet, yu folem hem. Mi no wantem gat wan fren we i lusum hed blong hem. Bae mi wan nomo mi go bak.” Nao hem i aot i go.

Nao Kristen mo *Sofsof* i wokbaot i go, mo tufala i stap storian. Nao Kristen i toktok i se, “Ei brata blong mi *Sofsof*, mi glad tumas from we yu bin lisiin long mi, mo yu folem mi. Mo sipos *Stronghed* i bin luksave ol nogud blong hem, olsem we mi bin luksave long laef blong mi, ating bae hem i no save go bak.”

Nao *Sofsof* i talem long Kristen se, “Ah, i oraet, naoia yumitu nomo. Ale, yu save talem long mi se wea ples stret ia nao bae yumitu go long hem. Ol man bae oli mekem wanem long ples ia mo bae oli glad olsem wanem?”

Nao Kristen i talem se, “Samting ia mi no save talemaot stret se i olsem wanem, be mi harem se mi mi glad tumas blong go long ples ia. Be sipos yu wantem lisin long toktok ia, bae mi save ridim long yu blong yu harem.”

Nao *Sofsof* i askem se, “Be yu ting se ol toktok long Buk ia oli tru ia?”

Afta Kristen i ansa se, “Be yes, ol toktok ia oli tru we oli tru. From hem i Tok blong God, mo God i no wan giaman God. Mo tu hem i no stap talem ol toktok we oli giaman, from Buk ya i gat ol Tok blong hem nomo i stap long hem.” (Taetas 1:2)

Nao *Sofsof* i talem long Kristen se, “Olsem ia yu tijimgud mi long wanem we i stap long Buk ia. Wanem nao hem i stamba tingting blong Buk ia?”

Kristen i ansa se, “Buk ia i tokbaot wan gudfala ples we i stap. Mo taem we bae ol man oli go long hem bae oli no save ded samtaem. Long ples ia bae oli stap harem gud olwe nomo.”

*Sofsof* i talem long Kristen se, “Oh, hem i gud tumas. Be i gat sam narafala toktok tu we Buk ia i talem?”

Nao Kristen i talem se, “Yes i gat sam narafala toktok i stap.” Hem i toktok bakegen i talem se, “Long ples we bae yumitu go long hem, bambae God i givim presen long yumitu. Presen ia hem i we Masta blong yumi bambae i



singaotem yumitu olsem stret man. Mo tu ol klos we bae oli givim long yumitu bae oli saen olsem laet.” (2 Timoti 4:8, Matiu 13:43)

*Sofsof* i talem long Kristen se, “Ei, fren, be i gud tumas ia. Be i gat sam moa toktok bakegen o no?”

Nao Kristen i talem olsem ia se, “Si, i gat fulap moa. Long ples ia God bambae i rabemaot wota long ae blong olgeta man, nao bae man i no moa ded, mo bambae man i no moa krae from man we i ded. Be bambae i nogat man i krae mo bambae man i no moa harem nogud long bodi blong hem.” (Revelesen 21:4, 7:16,17)

Nao *Sofsof* i askem se, “Be, ol wanem kaen man nao bae oli stap wetem mifala?”

Kristen i toktok i talem se, “Ol man we oli bin mekem God i harem nogud be naoia oli stap mekem gudfala fasin from we oli lavem God tumas. From samting ia God hem i luk olgeta olsem oli stret man. Bae fulap enjel tu bae oli stap. Mo tu, man we i bilif long Jisas, hem nao bae i stap long Heven. Long taem we oli stap long wol ia i gat fulap had taem long laef blong olgeta. Nao from ol samting ia, oli no wantem lego Papa God. Oli laekem hem tumas mekem se oli wantem blong folem Tok blong hem oltaem. (Jon 12:25)

“Bifo i bin gat sam king blong wol ia oli bin mekem i nogud long ol man. Olsem oli bin karem ol man mo katem olgeta, mo tu oli bonem sam man long faea. Mo oli sakem sam i go long solwota, mo oli sakem sam i go blong ol wael dog oli kakae olgeta. (Hibrus 11:33-40) Mo naoia ol man ia we king i bin mekem nogud long olgeta oli stap long Heven mo bae oli no save ded bakegen.”

*Sofsof* i talem se hem i harem tok ia i gud tumas, mo hem i talem long Kristen se, “Be mi no save se bae mi save stanap strong olsem olgeta we oli stap folem stret rod, o nogat?”

Kristen i toktok i talem se, “God i raetem tok ia long Buk blong hem, se sipos yumi askem, bae hem i givim long yumi. Mo tu sipos yumi wantem tumas blong kasem, bambae yumi save kasem.” (Luk 11:9-10, Revelesen 22:17, Jon 6:37, 7:37-38)

## **4 Tufala i foldaon long sofmad**

*Sofsof* i talem se hem i harem gud tumas long wanem we hem i stap harem. Nao i talem long Kristen se bae tufala i mas go nao.

Kristen i talem se, “Mi gat wan hevi bag i stap long baksaed blong mi, i mekem se mi no save wokbaot hariap.”

Kristen mo *Sofsof* i stap wokbaot i go, nao tufala i kasem wan ples we nem blong hem i *Sofmad*. I gat fulap sofmad i stap olbaot long ples ia, mo ol sofmad ia i dip mo man i save glis nogud long hem. Taem we tufala i stap storian mo stap wokbaot i go, tufala i no stap luklukgud rod, nao tufala i foldaon i godaon long sofmad ia. Klos blong tufala i doti we i doti from ol sofmad long ples ia. Taem we tufala i traem girap bakegen, Kristen i harem olsem se hem i no save girap from sofmad ia i dip tumas.

*Sofsof* i luk samting ia we tufala i fas long hem, nao hem i kros tumas, i askem long Kristen se, “Be naoia bae yumitu mekem olsem wanem blong yumitu aot long sofmad ia?”

Be Kristen i ansa i se, “Ei, mi no moa save nao!”

Nao *Sofsof* i kros we i kros tumas from ol toktok we Kristen i talem. Hem i se, “Fastaem yu bin talem long mi se bae yumitu go long wan ples we bae yumitu harem gud long hem. Be ating ples ia nao hem i gudfala ples we yu stap talem, ah? Yumitu kam long *Stret Rod* be naoia yumitu stap long trabol olgeta. Mo mi ting se yumitu harem nogud i naf ia nao, be no. Mo naoia sipos yumitu bitim ol sofmad ia, bae yu wan nomo yu go!”

*Sofsof* i kros tumas mekem se hem i sakem toktok olsem. Nao i tanemraon mo i wokbaot i gobak long ples blong hem. Afta, Kristen i no moa luk hem bakegen. Mo naoia hem wan



*Sofsof i tanemraon mo i wokbaot gobak*

nomo i wokbaot i go. Hem i lukluk i go long fored, ale hem i luk smol doa we *Ivanjelis* i bin talem long hem. Be bag we i stap long baksaed blong hem i hevi tumas, i mekem se Kristen i stap folfoldaon plante. Taem we hem i stap folem rod i go, hem i foldaon long sofmad ia bakegen, nao i slip i stap from hevi samting ia we i stap long baksaed blong hem. Be i no longtaem, wan man i kam klosap long hem. Nem blong man ia hem i *Givhan*.

*Givhan* i luk Kristen nao i talem long hem se, “Yu kamaot wea nao yu kasem rabis ples ia?”

Be Kristen i toktok i talem se, “Wan man, nem blong hem *Ivanjelis*, hem nao i soem rod ia long mi blong mi folem. Hem i bin talem long mi se, sipos mi folem rod ia i go, ol hevi samting we oli stap long baksaed blong mi bae oli lus. Ale, mi stap folem rod ia gogo, be mi kam long wan rabis ples olgeta.”

Nao *Givhan* i askem long hem se, “Be from wanem yu no lukluk gud sofmad ia taem yu stap wokbaot i kam long *Stret Rod*? From i gat ol ston long saedsaed blong yu save wokbaot long hem i kam kros. Mo sipos yu bin wokbaot long ol ston ia, bae yu no save foldaon olsem.”

Be Kristen i ansa i se, “Mi stap hariap blong kasem doa blong fanis ia we i go stret long rod, be taem we mi stap wokbaot mi sek we mi foldaon long sofmad.”

Nao *Givhan* i holem han blong Kristen mo i pulum hem i kam long strong graon. (Sam 40:2) Kristen i stanap klosap



*Givhan i holem han blong Kristen mo i pulum hem i kam  
long strong graon*

long *Givhan* mo i talem long hem se, “Mi wantem askem yu, from wanem nao i gat bigfala sofmad long rod we i go joenem *Stret Rod*? Sipos wan wokman i putum plante bigfala ston, bae ol man we oli wokbaot long rod ia oli save wokbaot antap nomo long ol ston.”

Afta *Givhan* i talem se, “Nogat. Sofmad ia i no save finis. Taem we man i harem nogud from ol sin blong hem o ol fasin nogud blong hem, mo hem i no laekem nating ol nogud ia, i olsem ol samting ia i foldaon i kam olsem sofmad. Hemia nao yumi singaotem nem blong ples ia *Sofmad*. Sipos wan man i save se bae hem i go pas long jajmen blong *Bigman*, bae hem i wari tumas long hem. Nao from we hem i tingting plante long ol sin blong hem, hem i save foldaon i go long sofmad ia. Be long *Stret Rod* i nogat sofmad. Nogat, rod i gud nomo.”

Nao *Sofsof* i go bak long ples blong hem, mo olgeta fren blong hem oli kam sekhan long hem. Mo samfala oli bin askem long hem se, “Kas, be yu yu go wetem Kristen from wanem, ating yu lusum hed ia?” Mo samfala oli laf mo oli kros long hem mo oli talem olsem ia se, “From wanem yu lego *Stret Rod* mo yu kambak? Yu yu les nomo ia mekem se yu kambak. Be yu yu wanem kaen man ia?”

*Sofsof* i sidaon we i sem we i sem, mo i no toktok. Be taem we sem blong hem i finis, hem i storian long hem wetem Kristen taem we tufala i bin foldaon long sofmad. Taem we hem i stap stori long hem, hem i stap laf nogud long ol samting we Kristen i bin mekem.

## **5 Kristen i no folem *Stret Rod***

Nao Kristen i wokbaot long rod bakegen, hem wan, mo hem i luk wan man we i stap sidaon aninit long bambu. Nem blong man ia hem i *Man blong Wol*. Ples blong hem i stap klosap long ples we oli talem *Nogud Ples Olgeta*. Man ia i ting se hem i waes long ol samting blong ples blong hem.

Taem Kristen i wokbaot long rod, *Man Blong Wol* i luk hem. Hem i luksave we Kristen i harem nogud mo i stap krae from we hem i stap karem hevi samting long bak blong hem.

Ale *Man Blong Wol* i talem long Kristen se, “Brata, yu stap go wea wetem hevi bag ia?”

Afta Kristen i ansa se, “Yes, i tru ia. Wanem we mi karem hem i hevi tumas. Mi tingting se i moa hevi bitim ol hevi

samting we ol man oli stap karem long wol ia. Yu wantem save se mi stap go wea? Mi stap go blong lukaotem wan smol doa long fanis we i stap long *Stret Rod* ia, from we wan man i bin talem long mi se i gat wan man long wei we i save soem hao nao mi save lego hevi bag blong mi ia.”

Nao *Man Blong Wol* i askem long hem se, “Be yu gat woman mo ol pikinini o no?”

Kristen i ansa se, “Yes, mi gat. Be sin ia i hevi tumas mo i spolem mi i mekem se mi no moa save tingbaot famle blong mi.”

Nao *Man Blong Wol* i talem long hem se, “Mi gat wan gudfala tingting we mi wantem talem long yu. Be yu wantem harem?”

Ale Kristen i talem se, “Sipos yu glad blong talem, bae mi lisin long yu.”

Ale *Man Blong Wol* i talem long hem se, “Be huia i talem long yu se sipos yu go long *Stret Rod* ia bae ol hevi sin blong yu i lus?”

Afta Kristen i ansa se, “Wan man we nem blong hem, hem i *Ivanjelis*.”

Be *Man Blong Wol* i ansa bak se, “Kas! Be tok ia we hem i talem i no tru nating. From sipos yu folem *Stret Rod* ia bae yu kasem moa trabol. Be i gat wan gudfala rod i stap we bae yu no save harem nogud long hem. Ating yu ting se mi stap giaman ia be no, bae yu luk ol tok blong mi i tru ia. Mi luk klos blong yu i doti tumas. Mi save finis from wanem i olsem. Klosap yu bin draon long bigfala *Sofmad*. Be from wanem yu stap folem rod ia yet? Yu kasem trabol finis mo



*Kristen i luk we wan saed hil i brok*

bae yu kasem moa bakegen. Yu yu no waes olsem mi, from yu yu yangfala yet. Mo sipos yu folem rod ia bae yu taed mo bodi blong yu bae i soa we i soa. Bae i gat ol rabis man we bae oli traem kilim ded yu mo tu ol rabis anamol tu bae oli wantem kakae yu. Rod ia hem i wan nogud rod from we hem i rod blong tudak mo ded nomo. (Hibrus 11:36-38) I nogud yu lisin long man ia from toktok blong hem bae i



spolem laef blong yu. Be olsem wanem nao yu save se yu gat bigfala sin we i hevi tumas long bak blong yu?”

Be Kristen i talem long hem se, “Mi bin ridim long wan Buk.”

*Afta Man Blong Wol* i talem long hem se, “Hemia nao mi ting se i olsem. Nogud Buk ia i giaman gud long yu. Yu bin ridim ol niufala tingting long Buk ia nao i mekem yu yu fraet, be maet Buk ia i no givhan nating long yu.”

Be Kristen i talem long man ia se, “Maet i olsem we yu stap talem, be mi save wan samting nomo - mi wantem lego hevi sin ia we mi stap karem.”

*Afta Man Blong Wol* i talem long hem se, “I gat plante nogud samting long rod ia we yu stap folem. Be sipos yu wantem gat pis long laef blong yu, i gud yu lisin long ol tok blong mi mo yu folem. Be from wanem yu stap folem rod ia? Bae mi soem long yu hao nao bae yu save gat pis oltaem long hat blong yu, mo bae yu no moa gat fraet, mo ol hevi sin ia bae i lus. Sipos yu lisin gud long ol tok blong mi bae yu gat pis mo yu save stap gud.”

Nao Kristen i talem long *Man Blong Wol* se, “Fren, ol toktok blong yu i no klia long mi mo mi wantem sipos yu talem bakegen.”

Be *Man Blong Wol* i ansa i se, “A, be yu yu wan smat man. I gat wan ples i stap longwe, we nem blong hem *Sidaon Gud*. Wan olfala we i waes, nem blong hem *Folem Loa*, i stap long ples ia. Mo boe blong hem, nem blong hem *Tok Kwaet*. *Folem Loa* hem i wan olfala man we i stap helpem ol man blong oli lego ol hevi sin blong olgeta, olsem

ol man we oli mekem rong mo olgeta we tingting blong olgeta i olbaot. Hem i stap mekem oli gat pis long laef blong olgeta.”

“Sipos yu go long haos blong olfala ia, mo yu faenemaot se hem i no stap, yu lukaotem boe blong hem, bae hem i save helpem yu. Mo sipos yu toktok wetem hem, bae ol hevi sin blong yu bae oli lus mo bae yu gat pis long laef blong yu. Nao sipos yu no wantem go bak long ples blong yu, yu save sanem toktok i go long woman mo ol pikinini blong yu blong oli kam stap wetem yu long ples ia *Stap Gud*. From long ples ia i gat ol haos, mo ol stoa mo ol samting oli no sas nating. Mo ol man long ples ia oli no stap giaman mo oli no ol man blong stil. Oli stap glad nomo oltaem. Mo taem we bae yufala i stap long ples ia bae yufala i stap harem gud oltaem nomo.”

Taem *Man Blong Wol* i stap toktok, Kristen i stap tingting we i stap tingting. Mo afta, Kristen i askem long *Man Blong Wol* se, “Be wea nao rod blong go long haos blong olfala ia, we nem blong hem *Folem Loa*.”

Nao *Man Blong Wol* i tekem Kristen nao tufala i go antap long wan smol hil nao i talem long hem se, “Yu luk hil ia longwe o no?”

Be Kristen i ansa i se, “Yes mi luk.”

Afta *Man Blong Wol* i talem se, “Sipos yu kasem hil ia mo yu luk se smok i kamaot long wan haos, hemia nao haos blong *Folem Loa*. Mo olfala ia nao bae i soem long yu fasin blong lusum hevi sin ia blong yu. Be fasfala samting we yu mas mekem, yu mas talem aot olgeta sin mo ol harem nogud blong yu long hem. Mo tu yu mas mekem sam

samting we i folem ol kastom blong mifala. Ol fasin we yu mas mekem i olsem, bae yu spet mo rabem long bodi blong yu, mo tu yu mas kilim wan pig.”

*Man Blong Wol* i talemaot ol samting ia long Kristen blong bae evri hevi sin blong hem bae i lus. Mo taem we Kristen i harem olsem ia hem i fogetem blong folem *Stret Rod* be hem i wantem faenem haos blong *Folem Loa* nomo. Nao hem i aot i go, be taem we hem i go hem i luk wan saed hil i brok mo i foldaon stret long rod we hem i stap wokbaot long hem. I mekem se Kristen i fraet blong wokbaot i go moa.

Hem i tingting se, “Ei, nogud bae bigfala ston ia i foldaon mo i brekem hed blong mi.” Nao hem i lukaotem rod blong folem i go, be hem i no luk wan rod nating we i gud blong folem. Naoia hem i harem olsem we bag we hem i stap karem i kam hevi moa. Mo tu, hil we i stap long saed blong hem i stap faerap mo Kristen i stap fraet. Nao ples i stap tudak i mekem hem i fraet moa mo tu hem i harem ples i kolkol tumas.(Hibrus 12:18-21, Eksodas 19:16,18)

## **6 Ivanjelis i Soem Rod Bakegen**

Long naet ia Kristen i tingting we i stap harem nogud i se, “E, be from wanem nao mi lisin long ol toktok blong *Man Blong Wol?*” Nao taem hem i stap tingting hem i luk *Ivanjelis* i kam. Hem i sem tumas taem we i luk *Ivanjelis*. Be *Ivanjelis* i tok kros long Kristen i se, “Kristen! Be yu stap mekem wanem long ples ia?”

Be Kristen i no ansa from hem i sem, nao i stap lukluk i go daon long graon nomo. Be *Ivanjelis* i toktok i talem se, “Kristen, yu tingbaot, taem mi bin stap klosap long ples blong yu bifo, *Nogud Ples*, mi bin luk wan man i stap krae. Huia man ia, i no yu ia?”

Kristen i talem se, “Yes, mi ia man ia we yu bin luk.” *Ivanjelis* i toktok i talem se, “Be mi ting se mi bin soem finis *Stret Rod* long yu we hem i tekem yu blong go kasem smol doa, be afta yu olsem wanem?”

Nao Kristen i ansa se, “Yes, yu bin soem long mi ia.”

*Ivanjelis* i se, “Be from wanem yu fogetem *Stret Rod* wikiktaem olsem ia?” (Galesia1:6)

Kristen i ansa se, “Taem we mi kamaot long bigfala *Sofmad*, wan man we i stap toktok tumas i kam toktok mo i pulum tingting blong mi blong mi go faenem wan man we i stap klosap ia nomo. Man ia bae i save karemaot ol hevi sin ia blong mi.”

Nao *Ivanjelis* i askem se, “Be huia man ia?”

Kristen i ansa se, “Man ia, nem blong hem *Man Blong Wol*. Mi mi ting se hem i wan gudfala man ia, be no, from we hem i switim mi, mekem mi wantem lisin moa long wanem we hem i talem. Nao ol toktok blong hem i mekem mi kasem ples ia we yumi stap stanap long hem naoia. Be taem we mi stap klaem long hil, mi fraet tumas, from mi ting se bae hil i brok i foldaon long hed blong mi mo bae i kilim ded mi. I mekem mi no moa save go moa.”

Be *Ivanjelis* i askem long Kristen se, “Be man ia i talem wanem long yu?”

Afta Kristen i talem se, “No, hem i askem nomo long mi se mi stap go wea? Afta mi talem long hem.”

*Ivanjelis* i askem se, “Be man ia i no askem wan narafala samting bakegen long yu?”

Be Kristen i ansa i se, “Si, hem i askem bakegen se mi gat famle i stap?” Afta mi ansa long hem se, “Si, mi gat. Be mi nomo stap tingbaot olgeta from mi stap tingbaot ol hevi sin blong mi we mi stap karem.”

Be *Ivanjelis* i askem bakegen se, “Be hem i no askem wan narafala toktok bakegen long yu?”

Nao Kristen i ansa se, “Hem i talem nomo se sipos mi lego ol hevi sin blong mi, bae mi save harem gud nomo. Mo hem i talem se, mi no sud ting hevi long ol sin blong mi. Afta mi talem long hem se, ‘Ale, mi wantem go long smol doa long fanis blong mitim man we bae i save soem rod blong lego hevi sin ia blong mi.’ From we mi bin toktok olsem, i mekem *Man Blong Wol* i wantem soem wan sotfala rod long mi we i sot bitim ol narafala rod. Taem *Man Blong Wol* i toktok olsem, i mekem mi mi bilif long ol tok blong hem, be taem mi folem ol tok blong hem, i tekem mi mi lusum *Stret Rod*. From samting ia nao mi stap long ples ia. Mi ting se bae mi lusum ol hevi sin blong mi ia. Be taem mi kam mi luk ol samting we oli stap long rod i mekem mi fraet tumas. Mo naomia mi no moa save wanem nao bae mi mekem.”

Nao *Ivanjelis* i toktok i se, “Yu lisen long ol tok we bae mi givim long yu we hem i tok blong God.” *Ivanjelis* i ridim Buk, mo Kristen i sek, from ol toktok long Buk ia i se, ‘Yufala i mas lukaot gud mo yufala no mas lisen long tok ia we man

ia i stap talem. From long taem bifo God i bin talemaot long ol man se oli mas lisin long hem, be oli no wantem lisin nating long hem. I mekem se long taem bifo ol man oli no save ronwe long panis blong sin blong olgeta. Mo God we i stap long Heven i stap wonem yumi. Sipos yumi tanem baksaed long hem yu ting se yumi save ronwe long panis blong hem? Nogat ia.” (Hibrus 12:25)

*Ivanjelis* i ridim wan moa toktok bakegen we i talem olsem ia, “Man we i bilif bambae i save laef. Be sipos hem i tanemraon i gobak bambae mi no save glad long hem nating.” (Hibrus 10:38-39)

*Ivanjelis* i toktok long Kristen se, “Yu bin foldaon mo klosap yu lusum laef blong yu.”

Taem Kristen i harem, hem i foldaon long graon mo i krae bigwan mo i toktok i talem se, “Be ating mi nogud we mi nogud nao? Mi lus evriwan?”

Be *Ivanjelis* i holem han blong hem mo i talem se, “Bilif blong yu i mas strong oltaem, (Jon 20:27) from bae God i save tekemaot olgeta sin blong yu.” (Matiu 12:31)

Kristen i stanap mo seksek taem hem i luk fes blong *Ivanjelis*. Nao *Ivanjelis* i talem wan narafala toktok se, “Yu mas folem gud ol tok blong mi. Mi wantem se bae yu lukaot gud long ol giaman man, olsem *Man Blong Wol*. From mining blong nem ia *Man Blong Wol* hem i man we i stap tingbaot ol samting blong wol nomo, mo i laekem blong stap gud long wol ia. Mo hem i bilif se long paoa mo hadwok blong yumi ia nao bae yumi save karemaot sin blong yumi. Be tingting ia i no tru nating.”

Mo tu *Ivanjelis* i talem bakegen se “*Man Blong Wol* ia i no wantem harem storian blong Jisas we i ded long kros blong karemaot sin blong man. Hem i no wantem lisin nating long ol toktok ia. Be i gat tri nogud samting we *Man Blong Wol* i bin mekem we i no stret. Fas samting, hem i bin tanem tingting blong yu blong yu folem rabis rod. Namba tu samting, hem i wantem se bae yu tanem bak blong yu long Jisas. Mo nambatri samting, hem i letem yu yu go long rod blong yu go ded.”

Nao taem we Kristen i harem ol toktok ia, hem i krae bigwan mo tingting blong hem se hem i wantem ded nomo. Kristen i toktok i se, “Mi bin lisin long ol toktok blong *Man Blong Wol* mo naoia mi lusum rod. Mi wan krangke man stret.”

Taem we Kristen i talem olsem, *Ivanjelis* i soem *Stret Rod* bakegen blong hem i folem. Nao *Ivanjelis* i toktok i talem se, “Yu folem gud *Stret Rod* we mi stap soem long yu mo bae yu save luk smol doa. Be long wokbaot blong yu, yu mas lukaot gud from i gat ol nogud man oli wantem spolem yu bakegen.”

## **7 Kristen i kilkilim smol doa mo i go insaed**

Taem we *Ivanjelis* i toktok finis, Kristen i stap hariap blong i folem *Stret Rod* bakegen, mekem se hem i sekhan wetem *Ivanjelis* afta i go. Taem Kristen i wokbaot i go long rod hem i stap luk ol narafala man tu i stap wokbaot, be hem i no toktok long olgeta. Mo taem we hem i stap wokbaot hem i fraet, mekem hem i tingting se, “Ei, nogud mi mestem mi go long wan rong ples.” Nao hem i wokbaot i go

kasem smol doa ia. Mo long smol doa ia oli raetem wan toktok long hem we i talem se, 'Yufala i mas kilkilim doa ia mo bae i open long yufala.' Afta we hem i ridim tok ia hem i kilkilim doa. Nao wan man we nem blong hem *Gudfala Hat* i openem doa smol nomo afta man ia i toktok i se, "Yu yu hui? Mo yu kam wea? Yu wantem wanem?"

Afta, Kristen i se, "Ei, sore tumas be mi mi wan rabis man nomo. From mi lego *Nogud Ples* mo mi mi wantem go long Heven. Mi kam ia from mi wantem ronwe long panis blong



*Gudfala Hat i openem smol doa blong Kristen  
i save go insaed.*



God.” Mo taem we *Gudfala Hat* i harem Kristen, hem i holem han blong hem i tekem hem i go insaed.

Nao *Gudfala Hat* i talem se, “Klosap ia i gat wan *Haos Blong Ol Enemi* we oli ol rabis man we oli stap rere nomo. Sipos wan man o wan woman i wantem kam insaed long doa ia bae ol rabis man ia oli stap haed mo oli holem ol spia blong oli sperem olgeta. Be i gat sam nomo we oli stap go insaed.

Kristen i lisin long ol tok blong *Gudfala Hat* mo i harem gud tumas from rabis man ia i no bin kilim ded hem. Afta i talem se, “Mi glad from hem i no bin ronem mi.”(Jon 6:37)

Nao *Gudfala Hat* i askem long Kristen se, ”Be huia i soem rod ia long yu?”

Afta Kristen i storian long hem se “Long taem we mi bin ridim Buk, i bin klia long mi se mi mi gat fulap sin long laef blong mi.”

*Gudfala Hat* i lisin long ol toktok blong Kristen afta i talem se, “Yu bin kam long ples ia mo naoia yu luk wan narafala rod ia. Taem yu wokbaot i go yu mas folem *Stret Rod* ia nomo. (Jon 10:9, 14:6, Ol Wok 4:12) Taem yu go bae yu luk i gat plante narafala rod i stap. Mo ol narafala rod ia oli ol bigfala rod be taem we yu luk yu no mas folem. (Mt 7:14) Taem we yu folem *Stret Rod* ia bae yu kamaot long haos blong wan man we nem blong hem *Talem Tok*. Yu go mo yu kilkilim doa blong hem mo bae hem i soem ol gudfala samting long yu.”

## 8 Insaed long Haos Blong *Talem Tok*

Nao Kristen i folem rod mo i kasem haos blong *Talem Tok*. Nao i go kilkilim doa be i no gat man i ansa, mekem se hem i wet. I no longtaem wan man i kam openem doa mo i toktok i se, “Be yu huia?”

Afta Kristen i se, “Mi nem blong mi Kristen mo mi kam from mi wantem toktok wetem man blong haos ia”.

Nao man ia i go singaotem *Talem Tok* i kam. Taem we *Talem Tok* i kam, Kristen i talem se, “Mi kam ia from we *Gudfala Hat* i bin sanem mi mi kam blong luk yu.”

Nao *Talem Tok* i talem long Kristen se, “Yu kam insaed long haos, bae mi soem plante gudfala samting long yu.” Be from tudak i kavremap ples finis, i mekem se *Talem Tok* i singaotem wokman blong hem blong laetem laet, mo hem i tekem Kristen i go long rum we bae i slip long hem.

### *Pija nambawan*

Long rum ia Kristen i luk wan pija i stap hang. Long pija ia hem i luk wan stret man i stap stanap. Mo man ia i stap lukluk i go antap long Heven mo i stap holem Baebol long han blong hem. Be long hed blong hem i gat wan ‘hat blong king’ i stap, mo hem i stap tanem baksaed blong hem long ol samting blong wol ia. Mo hem i wantem pulum ol man i go wetem hem. (1 Korin 4:15-16)

Nao *Talem Tok* i talemaot mining blong pija we Kristen i stap luk. Hem i se, “Man ia hem i save soemaot rod blong man i kasem niu laef. Wol i stap long baksaed mo ‘hat blong King’ i stap long hed blong hem, hem i olsem hem i

no wantem tinghevi long ol samting long wol ia be hem i stap glad tumas blong kasem ol gudfala samting we i stap long Heven.

### *Pija nambatu*

Ale, *Talem Tok* i tekem Kristen i go bakegen long wan narafala rum. Be rum ia i doti we i doti. Afta, *Talem Tok* i singaotem wokman blong hem blong i kam brum long floa. Mo taem we wokman i stap brum, doti blong floa i go long nus blong Kristen, i mekem Kristen i no moa save pulungud win. *Talem Tok* i talem long wokman blong hem blong i go kasem wota i kam, blong oli saksakem long floa, blong doti blong floa i no flae olbaot.

Nao *Talem Tok* i toktok long Kristen se, “Rum ia i olsem laef blong yumi. Mo ol doti blong floa i olsem sin we i mekem laef blong yumi i doti we i doti. Fastaem, taem we wokman i stat blong brum long floa be i gat fulap doti blong floa i stap yet, hem i olsem man we i folem loa blong God nomo. Mo biae, taem wokman i saksakem wota i go olbaot long floa, hem i olsem gud nius blong Jisas Kraes. Loa i no save mekem man i klin, from we i no save karemaot sin blong man. Mo tu, loa i mekem sin i kam klia long yumi be i nogat wan samting we i save karemaot sin ia. (Rom 7:9-11, 1 Korin 15:56, Rom 5:20) Be taem we man i kasemgud gud nius blong Jisas Kraes, bae gud nius ia i save karemaot sin blong hem. Mo bae hem i save klin gud mo bae King blong Heven i save stap long laef blong hem.”



*Talem Tok i soem sam pija long Kristen*

### *Pija nambatri*

*Talem Tok* i holem han blong Kristen mo i tekem hem i go long wan narafala smol rum bakegen we tu pikinini i stap sidaon long hem. Nem blong tufala pikinini ia hem i *Kasem Hariap* mo *Save Wet*. Pikinini ia, *Kasem Hariap* hem i wan

pikinini blong kros. Be pikinini ia, *Save Wet*, hem i wan kwaet pikinini mo hem i gat longfala tingting.

Taem Kristen i luk tufala hem i toktok i se, "From wanem *Kasem Hariap* i stap kros mo tingting blong hem i no save kam gud kwiktaem?"

*Talem Tok* i ansa se, "*Kasem Hariap* i olsem ia from we papa mo mama blong hem oli stap holem sam gudfala samting blong hem mo oli talem se long nekis yia nomo bae oli givim long hem. Be *Kasem Hariap* i wantem se bae hem i karem naoia nomo. Nao from samting ia, kros i fulap long laef blong hem.

Be narafala pikinini, *Save Wet*, hem i stap kwaet nomo mo i glad blong stap wet long ol gudfala samting ia.

*Kasem Hariap* i stap sidaon mo i no longtaem i gat wan man i kam insaed mo i stap holem wan bigfala bag nao i kapsaedem mane klosap long leg blong hem. Nao *Kasem Hariap* i luk fes blong *Save Wet*, mo i laf jikim hem.

Mo *Kasem Hariap* i karem mane blong hem i aot mo i go long taon. Nao taem we hem i kasem taon, hem i karem fulap samting mo mane blong hem i finis kwik taem. Nao biae ol niufala klos we hem i bin pem oli brokbrok mo oli kam nogud.

*Talem Tok* i talem long Kristen se, "Bae mi talem gud mining blong samting ia we yu bin luk naoia. *Kasem Hariap* i olsem pija blong man long wol ia. Hem i olsem ol man long wol we oli wantem gat evri samting blong wol ia. Mo *Save Wet* i olsem man we i stap wet blong kasem ol gudgudfala samting we i stap long Heven. From samting ia *Kasem*

*Hariap* i wantem tumas blong karem ol gudfala samting blong hem kwiktaem.” (Luk 16:25)

### *Pija namba fo*

*Talem Tok* i holem han blong Kristen mo tufala i go long wan narafala rum bakegen. Rum ia i gat wan fanis we oli mekem long ston. Mo klosap long fanis ia wan faea i stap laet we i no save ded. Faea ia i stap laet olwe nomo. Mo tu i gat wan man nogud we hem i stap klosap long faea ia mo ol taem hem i stap kapsaedem wota i go long faea ia blong mekem faea i ded. Be faea ia i stap laet i stap kam bigwan moa.

Taem Kristen i luk olsem hem i askem se, “Be wanem mining blong samting ia?”

Afta *Talem Tok* i talem se, “Faea ia i olsem Tabu Spirit we God i bin sanem i kam blong stap wetem ol man we oli bilif strong long Jisas. Be nogud man ia, we i stap kapsaedem wota blong kilim ded faea ia, hem i Setan. Be nomata we Setan i stap kapsaedem wota long faea ia, be faea i no save ded.”

Nao *Talem Tok* i tekem Kristen i go biaen long fanis. Mo long ples ia hem i luk wan man i stap holem wan botel oel mo i stap kapsaedem i go long faea.

Nao Kristen i askem se, “Be man ia i stap mekem wanem ia?”

Nao *Talem Tok* i ansa se, “Man ia hem i Jisas Kraes. Mo oel we hem i stap kapsaedem hem i olsem Tabu Spirit blong God. Nao from lav blong Jisas, hem i sanem Tabu



*I gat wan faea i stap laet we i no save ded*

Spirit i kam stap long laef blong yumi wanwan. Mo Jisas i wantem se man we i gat Tabu Spirit long laef blong hem i mas gat ol gudgudfala fasin i kamaot long laef blong hem. (Galesia 5:22-23) Be semtaem Setan i stap kapsaedem wota blong wantem mekem faea i ded, be hem i no save blokem wok ia we Tabu Spirit i stap mekem. Nao i gat sam man we oli stap pulum ol Kristin man blong oli mekem ol

nogud samting, olgeta oli wantem spolem wok blong Kraes long laef blong ol Kristin man. Be Tabu Spirit ia nao i stap holemtaet olgeta mekem se oli no foldaon long ol trik blong Setan.”

### *Pija namba faef*

Mo *Talem Tok* i soem Kristen wan bigfala fanis we i strong we i strong i raonem wan haos. Insaed long fanis, klosap long doa blong fanis ia i gat wan man i sidaon klosap long wan tebol. Man ia i holem wan buk, mo hem i mas raetem nem blong ol man, bifo oli save go insaed long haos. (Revelesen 20:15) Be tu, klosap long doa blong fanis i gat fofala strongfala man i stanap i stap.

Kristen i luk we klosap long fanis i gat plante man bakegen oli stap stanap i stap from we oli wantem go insaed. Be taem oli luk ol fofala strong man ia oli fraet blong go insaed. Be insaed long fanis ia i gat wan naesfala haos i stap. Mo i gat fulap man oli stap long haos we oli werem waet klos mo oli stap mekem welkam long ol man we oli stap kam insaed. Fulap man oli wantem go insaed long fanis ia be oli fraet long fofala strong man ia we oli stanap long fanis.

Nao i gat wan narafala strong man bakegen i kam, nao hem i go klosap long man we i stap sidaon long tebol, hem i talem se, “Eh, mi wantem se yu raetem nem blong mi long buk blong yu.”

Taem we hem i toktok finis hem i faet wetem olgeta fofala strong man ia. (Efesas 6:13) Man we i stap faet ia hem i gat wan strongfala tingting. Tingting blong hem se hem i



wantem go long naesfala *Haos Blong Bigman*. Mekem se hem i stap faet strong blong i kilim ded ol fofala strong man ia. Hem i winim fofala man ia, nao i ron i go insaed long *Haos Blong Bigman*. (Matiu 11:12)

Taem hem i go insaed hem i harem ol man oli stap singsing long wan naesfala singsing. Mo singsing ia hem i olsem, “Yu kam insaed, yu kam insaed, yu winim faet mo yu kasem laef, blong naoia i go yu stap gud.” Ale, hem i go insaed mo i go werem waet klos i sem mak long ol narafala man.

Nao Kristen i harem toktok ia mo i save mining blong pija ia mo i talem se, “Mi save gud mining blong samting ia. Nao, letem mi go wokbaot bakegen long rod.”

Be *Talem Tok* i talem se, “No yet. Yu wet smol, bae mi soem wan narafala samting long yu bakegen. Afta bae yu jes go.”

### *Pija namba sikis*

*Talem Tok* i holem han blong Kristen mo tufala i go insaed long wan rum we i tudak olgeta olsem wan kalabus. Mo i gat wan man i stap insaed long kalabus ia mo hem i stap harem nogud tumas nao i stap krae.

Nao Kristen i askem long *Talem Tok* se, “Be from wanem man ia i stap krae?”

Mo *Talem Tok* i se, “I moa gud yu askem stret long hem.”

Afta Kristen i go stanap klosap long kalabus mo i askem long man ia se, “Be yu yu huia?”

Nao man ia i talem se, “Fastaem mi ting se mi ia nao mi wan gudfala man from mi stap folem rod blong God, mo mi glad se bae mi kasem gudfala ples blong God.” (Luk 8:13)

Nao Kristen i askem se, “Be naoia yu olsem wanem?”

Man long kalabus i ansa se, “Naoia mi harem nogud tumas. From mi bin lego gudfala fasin mo tu mi no moa folem tingting blong God. (1 Tesalonaeka 5:6) Mo ol tingting nogud i holem mi i pulum mi mi foldaon long sin. (Jemes 1:14) Sin blong mi i blokem laet blong Tok blong God mo naoia Setan i kam stap wetem mi. I mekem Tabu Spirit i harem nogud tumas long samting we mi mekem, mo hem i lego mi finis. (Efesas 4:30) From samting ia nao, mi stap long kalabus mo mi nogat rod blong tanem tingting blong mi i kambak long God. (Hibrus 6:6)

Be Kristen i askem se, “Yu stap talem tru ia se i no moa gat wan narafala rod blong yu tanem tingting blong yu from sin blong yu?” (Hibrus 10:26-29)

Man ia i ansa i se, “Yes i tru ia, from God nomo i blokem mi blong mi no save tanem tingting blong mi i kambak long hem. Mo naoia bae mi stap long kalabus ia long ful laef blong mi. Ahwe, bae i nogud tumas ia. Bae mi bon long faea oltaem nomo.”

*Talem Tok* i talem long Kristen se, “Yu lisen gud! Yu no mas fogetem man ia. Wanem we yu luk naoia i olsem wan strong toktok we i stap kam long yu. Mo yu mas tingting hevi long wanem we yu jes luk.”

Nao Kristen i talem se, “Mi fraet tumas long wanem we mi luk. Bae mi mas askem God blong i givhan long mi blong

mi tanem baksaed blong mi long ol fasin nogud. Be mi save go nao o olsem wanem?”

Be *Talem Tok* i talem se, “No, yu wet fastaem. Mi wantem soem wan las narafala samting mo taem we yu luk finis, ale yu save go.”

### *Pija namba seven*

Nao *Talem Tok* i tekem Kristen i go long wan rum bakegen. I gat wan man i stap slip, be taem we tufala i go insaed, man ia i girap mo i stap kavremap hem long kaliko. From hem i stap seksek olsem we i kolkol.

Nao Kristen i askem se, ”Be from wanem nao man ia i stap seksek olsem ia?”

*Talem Tok* i ansa se, “Yu askem hem from hem nomo i save ansarem kwestin blong yu.”

Nao man we i stap seksek ia i ansa long Kristen se, “Mi bin drim long wan naet, taem we mi stap slip, mi drim se skae i blak mo i gat laetning mo tanda. Mo taem we mi lukluk i go antap mi luk wan man i stap sidaon antap long klaod ia, mo fulap enjel oli stap klosap long hem.

Nao wan voes i stap talem se, 'Ol ded man, yufala i girap mo kam long kot from we hem i taem blong jajmen.' Taem we hem i toktok ol man we oli ded oli girap mo oli go. Mo samfala long ol man ia oli stap glad be sam oli fraet tumas. Nao i talem long ol enjel blong hem se, 'Man we i no gat nem long Buk blong Laef, yufala i sakem hem long faea we i no save ded.' (Matiu 3:12, Revelesen 20:13-15)

Afta we mi harem toktok ia mi luk wan bigfala hol we i dip i no gat en blong hem. Hol ia i stap klosap long mi mo mi luk faea mo smok i kamaot long hol ia. Taem mi luk ol samting ia mi ting se taem blong jajmen blong God i kam finis.

Fulap man oli girap mo oli stap go antap be mi mi no go wetem olgeta from we mi save se mi no rere yet blong pas long jajmen ia. Mi fraet tumas blong luk ol samting ia, mekem se mi openem ae blong mi hariap nomo.” (1 Tesalonaeka 4:16, 17)

Kristen i harem evri stori blong wanwan pija we hem i luk mo hem i stap tingting plante.


Nao *Talem Tok* i talem long Kristen se, “Ale, God bae i stap wetem yu mo bae i lukaotem gud yu long wokbaot blong yu blong go long Heven, mo bae hem i tekem yu i go long ples blong hem.”

Taem Kristen i harem toktok ia hem i lego *Talem Tok* mo i wokbaot i go, mo i stap singsing long ol singsing blong talem tangkiu long God.

## **9** Ol sin blong Kristen i lus

Nao Kristen i wokbaot long *Stret Rod*. Taem we Kristen i wokbaot i go, hem i luk tu fanis. Wan i stap long raetsaed mo narawan i stap long lefsaed, mo Kristen i wokbaot long medel blong tufala fanis ia. Nem blong tufala fanis ia hem i *Karem Bak Yumi*.

Taem Kristen i wokbaot, hem i wokbaot hariap, be ol sin we hem i stap karem oli hevi tumas, mekem se i had tumas



*Taem Kristen i go klosap long kros, hevi bag blong sin i lus*

blong hem i wokbaot. Nao Kristen i wokbaot i go antap long wan hil, we nem blong hil ia i Kalvari, mo long hil ia i gat wan kros we oli wokem long tu pis wud. Klosap long kros ia i gat wan gref be i nogat dedman long hem.

Kristen i wokbaot i go klosap long kros mo kwiktaem nomo ol hevi sin we hem i stap karem oli kam kamaot long hem mo oli foldaon i go long gref. Kristen i harem se ol hevi

sin ia oli nomo gat long hem, i mekem hem i glad tumas mo i singaot i talem se, “Harem nogud blong Jisas i karemaot sin blong mi, mo ded blong hem i givim laef long mi.”

Long taem we Kristen i luk kros, hem i harem gud tumas mo wota blong ae i stap folfoldaon. Mo taem we hem i stap krae, trifala enjel blong God oli kam sekhan long hem, mo oli talem se, “Pis blong God i stap wetem yu.”

Fas enjel i toktok i talem se, “Olgeta sin blong yu, God i tekemaot finis.” (Mak 2:5)

Nao namba tu enjel i karemaot ol klos blong Kristen we oli brokbrok nogud mo i givim ol niufala waet klos long hem. (Sekaraea 3:4)

Ale namba tri enjel i putum wan mak long fes blong Kristen mo givim wan smol buk long hem. Smol buk ia i gat nem blong God i stap long hem. Wetem tufala samting ia hem i makemaot Kristen se hem i man blong God. (Efesas 1:13)


Nao enjel ia i talem long Kristen se, “Long wokbaot blong yu, yu mas ridim smol buk ia. Mo taem we bae yu kasem doa blong Heven, yu save givimbak smol buk ia i go long God. Smol buk ia bae i givhan blong yu tingbaot oltaem se yu yu lusum hevi bag blong sin blong yu long kros blong Jisas, mo yu yu blong *Bigman* nao.”

Nao taem Kristen i harem tok ia, hem i glad tumas nao i singsing olsem, “Ol sin blong mi oli lus long hil ia Kalvari.”

Taem Kristen i wokbaot i go, klosap long stamba blong hil, hem i luk tri man oli stap slip klosap long wan bigfala hol mo leg blong olgeta oli fasem long jen. Wan long ol man ia

nem blong hem i *Ston Hed* mo narafala man nem blong hem i *Les Man* mo narawan hem i *Stap Nating*. Kristen i kam nao, i luk trifala man i stap slip. Nao hem i traem blong wekemap trifala ia blong hem i toktok long olgeta, from we hem i no wantem se bae oli lus.

Mekem se hem i talem long trifala se, “Yufala i girap, from i nogud bae yufala i lus. I gat wan bigfala hol we i nogat en blong hem we i stap klosap long yufala. Yufala i hariap blong lego ples ia. Bae mi helpem yufala blong karemaot jen ia.” Nao Kristen i traem blong karemaot jen ia



*Trifala man ia, Ston Hed, mo Les Man, mo Stap Nating oli no fraet nating blong oli lus*

long trifala.

Be trifala i talem long Kristen se, “Eh, lego, hem i oraet nomo, from mifala i no fraet.” Mo afta we oli tok olsem ia oli slip bakegen. Kristen i lego olgeta, be hem i wari tumas long olgeta from we trifala man ia i bin talem long hem se oli no fraet blong oli lus. (Proveb 6:10)

Taem Kristen i stap wokbaot i go, hem i tingting tumas long samting ia. Nao hem i luk tu man i klaem long fanis blong kam long *Stret Rod*. Nem blong wan long tufala hem i *Kristen Long Maot* mo narawan hem i *Kristen Long Skin*.

Taem we tufala i kam klosap, Kristen i askem se, “Yutufala i kamaot wea ia mo stap go wea?”

Tufala i ansa se, “Mama blong mitufala i bin bonem mitufala long wan ples we oli singaotem *Giaman Glad*. Be mitufala i stap go long Heven blong stap olsem tufala impoten man.

Nao Kristen i talem long tufala se, “Nating we yutufala i kam blong go long Heven, yutufala i no pas tru long smol doa fastaem be yutufala i klaem long fanis ia nomo. Wanem we yutufala i mekem hem i no stret long fes blong *Bigman*. Bae hem i no save letem yutufala i go long ples blong hem.”

Ale tufala i talem se, “Be from rod we mitufala i folem ia hem i sot. Long ples blong mitufala, mifala i save mekem olsem ia blong go insaed. Yu bin kam tru long smol doa blong fanis be mitufala i klaem long fanis mo kam. Be, i oraet nomo from yumi stap go long sem rod.”

Be Kristen i talem se, “Mi mi bin folem ol toktok blong *Bigman* nao mi kam, be yutufala i folem tingting blong



yutufala nomo mo kam. Tok blong God i talem se kaen fasin we yutufala i mekem, hem i fasin blong wan stil man.”(Jon 10:1)

Tufala i stanap mo oli no moa toktok. Be wan long tufala man ia i toktok i se, “Oraet yu go fastaem bae mitufala i jas kam biae.”

Nao Kristen i go fastaem long tufala. Be i no longtaem *Kristen Long Maot* mo *Kristen Long Skin* i kasem Kristen, mo tufala i toktok strong long hem se, “Yumi semak nomo. Toktok we yu bin folem blong kam, mitufala tu i folem sem



*Kristen i luk Kristen Long Maot, mo Kristen Long Skin i klaem long fanis blong kam long Stret Rod.*

toktok ia. I gat wan samting nomo we i defren, hem i waet klos blong yu.”

Kristen i tok i talem se, “Be yutufala, i mas save se God we i stap long Heven hem ia nao i bin givim waet klos ia long mi. From taem we bae mi kasem doa long Heven, God bae i luk waet klos blong mi, wetem smol buk we mi holem mo mak we i stap long fes blong mi, mo bae hem i letem mi mi go insaed long Heven. Be from we yutufala i no bin go long smol doa (Galesia 2:16) yutufala i no gat waet klos, mo yutufala i no gat smol buk mo yutufala i no gat mak long fes blong yutufala.”

Taem we Kristen i talem olsem, tufala i no moa toktok. Tufala i lukluk Kristen mo tufala i laf long hem.

## 10 Kristen i go long Hadwok Hil

Kristen wetem *Kristen long Maot* mo *Kristen long Skin*, trifala i wokbaot i go klosap long wan hil we nem blong hem *Hadwok Hil*. Long stamba blong hil ia, i gat wan smol wota i stap. Long ples ia, i gat tufala rod we i go long bus, i stap saed saed long *Stret Rod* we i go antap long hil.

Nao Kristen i luk wota afta i go dring smol, mekem se hem i kasem moa paoa blong wokbaot long hem, afta hem i stat blong ron i go antap long hil. (Aesea 55:1-2) Be *Kristen long Maot* mo *Kristen long Skin* i kam stanap daon long *Hadwok Hil*, mo tufala i luk se hil ia i bigwan tumas, mekem se tufala i no go long *Stret Rod* be tufala i folem rod we i stap saed saed.

*Kristen Long Maot*, hem i go long rod we oli singaotem *Rod Nogud*, mo taem hem i folem rod ia hem i kam long wan bigfala bus, mo hem i traem blong faenem rod, be hem i no faenem. Mekem se hem i lus. Be *Kristen Long Skin* hem i folem *Rabis Rod* nao i foldaon long wan hol, mo i ded.

Nao Kristen i stap ron i go antap long hil, i stap folem *Stret Rod*. Hil ia i antap tumas nao leg mo bodi blong hem i soa, be hem i gohed i wokbaot nomo i go antap. Hem i harem se hem i no moa save wokbaot long leg blong hem, be hem i holem ol tri mo ol ston mo klaem i go antap. Be san i strong tumas nao i stap bonem hem.

Be taem hem i no kasem antap yet, hem i luk wan gudfala ples blong spel long hem. Ples ia God hem wan i bin putum blong ol man we oli kam long bigfala hil ia, oli save sidaon long hem mo spel gud. Nao Kristen i kasem ples ia mo hem i sidaon mo spel. Mo hem i karemaot smol buk blong hem long basket mo i ridim sam toktok we i stap insaed long hem.

Taem we hem i stap rid, hem i harem se hem i taed tumas, nao hem i slip, mo hem i slip longtaem. Be taem we hem i stap slip, smol buk we hem i stap ridim, i foldaon long han blong hem. Be Kristen i no save se smol buk i foldaon. Mo taem we Kristen i stap slip yet, wan man i kam wekemap hem mo i talem long hem se, “Ei, les man, i moa gud yu lanem fasin blong ol anis mo yu folem fasin blong hadwok blong olgeta.” (Proveb 6:6)

Taem Kristen i harem ol tok ia, hem i girap mo gohed blong klaem i go antap long hil. Long wokbaot blong hem,

hem i luk tu man i stap wokbaot i kambak daon. Wan, nem blong hem *Fraet Smol* mo narawan nem blong hem *Tu Tingting*.

Kristen i askem long tufala man ia se, “Ei, yutufala i olsem wanem? From wanem yutufala i kambak? Yutufala i bin fraet long hadwok. Ah?”

Afta tufala i talem se, “Nogat. Mitufala i bin luk tu bigfala laeon we oli stap long medel blong rod, mo mitufala i no bin save se tufala laeon ia i stap slip o no. Be mitufala i fraet tumas. Nogud tufala laeon ia i kakae mitufala. Mekem se mitufala i ronwe mo kambak daon.”

Kristen i fraet tumas taem we i harem toktok blong tufala man ia mo tingting ia i kam long hem se, “Ating sipos mi go antap ol laeon ia bae oli kakae mi. Be i nogud tu blong mi go bak, from sipos mi go bak long olfala ples, bae mi lus olgeta. Naoia mi no save se bae mi mekem wanem nao. Ating bae mi go antap nomo long hil.”

Nao *Fraet Smol* mo *Tu Tingting* i go bak daon be Kristen i wokbaot i go antap. Taem we Kristen i stap wokbaot i go antap, hem i tingbaot blong ridim smol buk blong hem bakegen. Nao i stap lukaotem smol buk ia, be hem i no faenem. Smol buk i lus mo hem i no save se i stap wea, mekem se hem i harem nogud.

Hem i tingting nao i talem se, “Ating taem we mi stap slip, smol buk ia i foldaon long graon.”

Taem we hem i tingting olsem hem i nil daon mo i prea long God, blong God i fogivim hem from mestek blong hem. (Revelesen 2:5) Hem i prea finis, nao hem i wokbaot i go



*Fraet Smol mo Tu Tingting i fraet long laeon,  
nao tufala i ronwe kambak daon*

bak blong lukaotem smol buk. Hem i sem tumas, mo i krae i tingting olsem, “God i bin mekem gudfala ples blong ol man oli spel gud, be mi mi olsem wan krangke man nomo. Mi man nogud. Mi no sud slip ded olsem. (1 Tesalonaeka 5:6)

Kristen i gobak bakegen long ples we hem i bin slip long hem mo i sidaon mo i krae smol. Afta, hem i lukaotem smol

buk ia gogo i faenem we i stap long mat. Ale, hem i putum smol buk long basket blong hem. Hem i glad tumas taem we hem i faenem smol buk ia, from we smol buk ia i blong mekem bilif blong hem i strong moa mo blong bae hem i kasem laef ia we bae i harem gud oltaem nomo.

## **1 1 Kristen i go stap long Haos Blong Ol Man Blong Bigman**

Taem we Kristen i faenem smol buk ia, hem i hariap i wokbaot i go antap long hil bakegen. Be taem we hem i no kasem antap yet san i go daon, mekem ples i tudak. I mekem hem i harem nogud tumas long wanem we hem i mekem. Hem i tingbaot bakegen toktok blong *Fraet Smol mo Tu Tingting* we tufala i bin luk tu laeon long rod.

Kristen i tingting se, sipos hem i wokbaot i go long tudak bae ol laeon ia bae oli kakae hem. Taem we hem i tingbaot olsem ia hem i no moa save wanem nao blong mekem. Be taem we hem i lukluk i go hem i luk wan naesfala haos we nem blong hem *Haos Blong Ol Man Blong Bigman*. Hem i stap wokbaot hariap nomo blong kasem haos ia blong i slip. Be taem we hem i wokbaot i go hem i luk tufala laeon ia i stap long fored blong haos.

Nao Kristen i stap tingting se, “Ei, be naoia mi luk wanem we tufala man ia i bin fraet long hem we tufala i bin talem long mi.”

Nao i gat wan man we i stap long haos ia, nem blong hem *Lukaot Gud*. Man ia i luk se Kristen i stap fraet taem hem i stap kam klosap long tufala laeon, nao man ia i

singaot i se, “Eh, be yu stap fraet long wanem? (Mak 4:40) Tufala laeon ia oli fasem long jen. Hemia blong traem bilif blong yufala blong luk se bae yu go tru o bae fraet i mekem yu wantem go bak. Sipos yu wokbaot long medel rod, bae tufala laeon ia oli no save kakae yu.”

Be taem Kristen i stap wokbaot i go, hem i fraet long tufala laeon ia i mekem hem i seksek. Be from we hem i bin harem tok blong *Lukaot Gud* i mekem hem i wokbaot gud nomo i go. Tufala laeon i singaot strong long Kristen be tufala i no save go klosap long hem from jen. Kristen i bitim tufala laeon nao i go i luk *Lukaot Gud* mo i talem se, “Mi wantem slip long haos blong yu.”

Afta *Lukaot Gud* i talem long hem se, “God hem wan i bin mekem haos ia blong givhan long ol man we oli stap go long Heven. Be yu kam long wanem ples ia?”

Kristen i toktok i se, “Mi lego *Nogud Ples* finis mo mi stap wantem go long Heven. Be mi wantem tumas se tede long naet bae mi slip long haos ia.” Afta, *Lukaot Gud* i askem long Kristen se, “Be wanem nem blong yu?”

Kristen i ansa se, “Bifo, nem blong mi *Sina Man*, be naoia nem blong mi Kristen.” (2 Korin 5:17)

Nao *Lukaot Gud* i askem long Kristen se, “From wanem yu no bin kam taem ples i delaet yet be yu kam we san i go daon finis?”

Ale Kristen i storian long wanem we hem i bin fesem long wokbaot blong hem.

Afta, *Lukaot Gud* i singaotem wan woman i kam, nem blong hem *Waes*. *Waes* i kam mo *Lukaot Gud* i talem long

hem se, “Man ia nem blong hem Kristen mo hem i bin wokbaot longwe i kam. Mi wantem se yu givim kakae long hem mo yu lukaotem gud hem, blong bae hem i storian long ol samting we hem i bin fesem o i bin luk long taem we hem i stap folem *Stret Rod* blong kam.”

Nao woman ia i givim kakae long Kristen mo Kristen i stori long ol samting we hem i bin fesem long taem we hem i lego *Nogud Ples*, blong i wokbaot i go long rod blong go kasem Heven.

Taem we woman ia i harem storian blong Kristen hem i krae bigwan. Mo hem i talem se, “Yu wet smol. Mi wantem se ol famle blong mi bae oli kam sekhan long yu, mo bae olgeta tu oli lisin long wanem we yu bin fesem long wokbaot blong yu.”

Ale *Waes* i go singaotem trifala sista blong hem. Nem blong trifala woman ia, hem i *Gudfala Tingting*, mo *Gudfala Wok*, mo *Gud Tumas*. (Filipae 1:9-10) Ale, olgeta oli kam, mo papa mo mama blong *Waes* tu oli kam. Nao oli toktok wetem Kristen se, “Yu kam, yu yu man blong Jisas. Yu stap wetem mifala fastaem.”

Ale Kristen i sidaon wetem olgeta mo hem i swet mekem se wan woman i karem kolwota i kam givim long hem. (Matiu 10:42) Afta, trifala woman ia i sidaon mo lisin long ol samting we God i mekem long Kristen mo oli givim sam kakae long hem. Ale taem we hem i finis kakae, oli prea finis afta oli go wanwan long ol rum blong olgeta blong slip.

Fastaem oli tekem Kristen i go antap long wan bigfala rum, we oli singaotem *Harem Gud*. Ale Kristen i slip long



rum ia kasem moning. Afta oli soem wan samting we i stap long rum blong hem.

Samting we oli soem long hem, hem i wan buk we i gat ol nem blong ol man blong Jisas Kraes i stap long hem. Mo buk ia i talemaot klia se Jisas hem i pikinini blong God, mo hem bambae i laef oltaem, mo bambae i stanap oltaem long fes blong God, blong prea from olgeta. Mo buk i talem tu se, “Jisas i winim faet mo hem i winim ol enemi finis.” (Revelesen 3:21) “Nating we sam man i bin tok flas long hem, be God hem i fogivim olgeta long ol rabis fasin blong olgeta”. (Aesea 53:12, 1 Pita 2:23) Mo wan toktok bakegen we i stap long buk ia i olsem, “Tok blong God we ol profet oli stap talemaot long wanem we bambae i hapen, evri samting i bin kamtru.” (Ol Wok 13:29) Ale Kristen i luk we ol toktok ia i stap long buk ia we oli soem long hem.

Afta oli tekem hem i go long wan narafala rum blong hem i luk ol samting blong faet. I gat naef blong faet mo hat blong faet mo ol klos blong faet we oli wokem long aean, mo sil blong blokem ol ara.

Ol bubu bifo oli bin faet long ol enemi mo oli winim faet. Afta oli putum ol samting blong faet long rum ia blong man i luk mo i tingbaot. Mo taem we Kristen i luk ol samting ia hem i glad tumas. Be hem i wantem wokbaot bakegen long rod, be ol fren blong hem oli blokem hem from oli wantem se bae hem i stap wetem olgeta bakegen.

Afta wan i toktok i talem se, “Sipos i san tumora, mi wantem soem wan hil long yu, we nem blong hem, *Hil Blong Harem Gud*. (Sam 48:1-2) Hem i ples blong stap harem gud oltaem. Mo God tu bae i harem gud long ol man blong hem



*Kristen i luk we ol gudfala toktok ia i stap long buk ia  
we oli soem long hem.*

we oli stap tanem baksaed blong olgeta long *Nogud Ples*  
mo oli folem rod blong go long Heven.”

Kristen i harem ol toktok ia i mekem se hem i stap wan  
moa dei, afta oli go luk *Hil Blong Harem Gud* mo oli luk  
plante tri i stap long hil ia. Mo tu oli soem wan ples we oli  
singaotem *Ples Imanuel*. Be oli no go long hil ia be oli stap  
lukluk i go nomo. Mo oli talem long Kristen se, “Taem yu

kasem hil ia bae yu save se yu stap klosap long Heven nao. Mo yu save luk doa blong Heven.”

Ale, Kristen i luk ol samting ia, nao hem i wantem wokbaot i go bakegen long rod, mo oli no blokem hem, oli letem hem i go nomo.

## 12 Kristen i putum ol samting blong faet mo i wokbaot i go

Taem Kristen i stap rere blong go, wan long olgeta i singaot i go long hem se, “Eh, yu wet smol. Yu mas putum klos blong faet fastaem. From we i gat ol enemi blong God i stap long rod we oli wantem kilim yu.”

Nao Kristen i karem ol samting blong faet mo i wokbaot i go. Mo ol fren blong hem oli go putum hem long rod mo oli sekhan. Ale *Lukaot Gud* i stap long rod mo Kristen i askem long hem i se, “Ei, be yu bin luk wan man i wokbaot i go fastaem o nogat?”

*Lukaot Gud* i ansa se, “Yes mi luk wan man. Nem blong hem, *Holem Taet Bilif*.”

Kristen i talem se, “Ah, be mi save man ia! Mitufala blong wan vilej nomo. Yu luk se hem i go longwe finis, o olsem wanem?”

Be *Lukaot Gud* i talem se, “Hem i lego hil ia finis mo naoia hem i stap godaon.”

Taem Kristen i harem olsem, i talem se “I oraet, bae hem i go fastaem.”

Afta olgeta fofala woman i go wetem hem kasem bigfala



*Yu mas putum klos blong faet fastaem*

rod. Taem we oli stap folem Stret Rod i go, oli stap storian long ol wok blong Jisas. Be taem we oli stat go daon, Kristen i talem long ol woman ia se, “Fastaem mi bin fesem hadtaem blong klaem i kam antap long hil, be naoia we mi stap go daon long hil, mi harem se i no wan isi samting tu, from rod ia, graon i glis mo i tantanem olbaot.”

Nao *Waes* i talem se, “Tru ia. Fulap man oli no wantem nating blong stap wokbaot i go daon long ol hil ia. Nem blong ples ia we i stap daon hem i, *Tingting i Stap Daon*, mo long ples ia, bae yu save lus long hem. Ale, bae mifala i save wokbaot wetem yu i godaon long hil ia, afta bae yu wan nomo yu wokbaot i go.”

Taem we oli kasem daon, ol woman ia oli givim kakae long Kristen. Mo Kristen i talem tangkiu long olgeta, afta i wokbaot i go long ples ia *Tingting i Stap Daon*. Naoia Kristen i putum ol klos blong faet, mo tu hem i holem wan naef blong faet.

## 13 Kristen mo *Spolem Man* tufala i faet

Long ples ia, *Tingting i Stap Daon*, Kristen i wokbaot i go long rod mo i luk wan enemi blong hem i stap wokbaot i kam. Nem blong man ia hem i *Spolem Man*. (Revelesen 9:11) Taem Kristen i luk hem, hem i fraet mo i gat tu tingting. Fas tingting blong hem se bae hem i mas wokbaot i gobak long ples blong hem. Narafala tingting se bae hem i mas kilim ded enemi blong hem. Tufala tingting ia i mekem hem i harem nogud tumas. Nao i no moa save se bae hem i go bak o bae hem i wokbaot i go nomo.

Be taem we Kristen i stap tingting yet, *Spolem Man* i kam klosap long hem. Mo Kristen i luk se bodi blong enemi blong hem i defren we i defren. Skin blong hem i olsem skin blong snek mo tu hem i gat tu wing olsem ol igel. Leg blong hem i olsem leg blong buluk. Maot blong hem i bigwan olsem maot blong wael puskat. Mo taem we hem i pulum



*Spolem Man mo Kristen i stap faet gogo kasem aftenun*

win blong hem afta i lego, bae faea mo smok i stap kamaot long maot blong hem.

*Spolem Man* ia hem i bos blong *Nogud Ples*, mo hem i wantem kilim ded Kristen. Nao *Spolem Man* i talem long Kristen se, "Mi mi bos blong yu mo yu mas stap aninit long mi. Mo from wanem yu bin lego mi? Mi wantem tumas blong

kilim yu naoia, be mi wantem yu kam wokman blong mi bakegen.”

Be Kristen i toktok i talem se, “I tru, mama blong mi i bonem mi long ples blong yu, be yu wan rabis bos from yu stap mekem mi mi hadwok nomo. Mo tu mi no laekem pei blong yu from we pei ia hem i ded nomo. (Rom 6:23) Mo naoia bos blong mi hem i Bigman. Mi glad tumas long wok we hem i stap givim long mi, from pei blong hem i gud tumas, mo tu mi laekem ol man blong Bigman, oli ol gudfala man. Be ol samting blong yu oli no tru, oli ol giaman samting nomo. Mo bae yu no save tekembak mi. From naoia mi stap wok blong Bigman mo mi laekem tumas blong bae mi stap folem hem nomo.”

Taem Kristen i toktok finis, *Spolem Man* i kros we i kros tumas. Nao hem i tekemaot spia blong hem blong i sperem jes blong Kristen, be Kristen i blokem spia ia wetem sil we hem i stap holem. Nao Kristen i yusum naef blong i faet wetem *Spolem Man*. (Efesas 6:17) Tufala i stap faet gogo kasem aftenun. Nao *Spolem Man* i kilim nogud Kristen long hed mo leg blong hem mo blad i ron bigwan. Mo taem we Kristen i traem blong stanap stret be leg blong hem i soa tumas i mekem hem i foldaon. Nao *Spolem Man* i stap rere blong i kilim ded Kristen.

Kristen i holem naef blong hem bakegen mo i talem se, “Enemi blong mi, yu yu no save glad taem yu luk mi foldaon from bambae mi girap bakegen mi stanap.” (Maeka 7:8)

Afta we Kristen i talem olsem, hem i girap mo i kilim nogud *Spolem Man*, nao enemi blong hem i foldaon. Mo Kristen i singaot long hem se, “Ei, yu yu no save win from we Jisas i

laekem mi tumas nao i stap mekem mi mi win oltaem.” (Rom 8:37)

Taem Kristen i talem toktok ia tufala i faet bakegen, be Kristen i kilim *Spolem Man* nao hem i ronwe, mo hem i nomoa luk hem bakegen. Kristen i harem gud tumas from we hem i winim faet, hem i stap lukluk i go antap mo i stap smael. Mo i talem tangkiu long God from we hem i bin helpem hem blong i winim *Spolem Man*.

Nao Kristen i luk han blong wan man i givim sam lif long hem mo hem i putum ol lif ia long fes mo leg mo skin we *Spolem Man* i bin kilim hem. Mo ol soa i kam gud bakegen.

Nao hem i kakae ol kakae we ol fren blong hem oli bin givim long hem. Taem we hem i kakae finis hem i kam strong bakegen nao i wokbaot i go bakegen long rod. Hem i holem naef blong hem mo i stap lukluk raon. Sipos hem i luk enemi blong hem ia bakegen, hem i rere blong kilim hem i ded. Hem i wokbaot i go bitim ples ia *Tingting i Stap Daon* be hem i no moa luk enemi blong hem *Spolem Man*.

## 14 Kristen i fraet long Dakbus

Kristen i bitim ples ia *Tingting i Stap Daon* mo i kasem wan narafala ples bakegen we oli singaotem *Dakbus*.

Tu man i ron i kam luk Kristen mo tufala i talem se, “Ei fren, long ples ia i gat fulap nogud samting. Ples i tudak we i stap tudak olgeta. I gat fulap wael anamol mo ol snek i kamaot long wan bigfala hol. Mo mitufala i harem ol noes



olsem voes blong man we i singaot bigwan taem hem i harem nogud." (Sam 69:14-15)

Kristen i harem ol toktok ia mo i talem se, "Yes, mi save se maet ol toktok ia oli tru, be rod ia hem i *Stret Rod*. Olsem sipos yu wantem blong kasem Heven, yu mas folem nomo. Ol fren blong mi, nating we fulap defren samting i stap long rod blong oli mekem mi mi fraet, be bae mi mas gohed nomo blong wokbaot i go long rod ia."

Ale, Kristen i wokbaot i go, be i gat bigfala hol long wan saed blong rod, mo long narasaed i gat bigfala sofmad. Mo rod ia i no wan bigfala rod, hem i smol nomo. Be Kristen i wokbaot sloslo nomo blong hem i no foldaon i go long hol ia, mo tu hem i stap lukaot blong i no foldaon long narasaed rod we hem i sofmad.

Hem i wokbaot sloslo nomo mo hem i luk rod we i go long Hel. Taem hem i kam long ples ia hem i luk wan faea we i hot tumas mo i stap faerap we noes blong hem i bigwan we i bigwan, mo tu, bigfala smok i stap kam antap, mo ol devel oli stap krae blong mekem Kristen i fraet.

Be long ples ia Kristen i no save faet wetem naef blong hem, mekem se hem i karem wan defren samting blong faet long hem. Mo samting ia yumi singaotem 'prea'. (Efesas 6:18) Nao Kristen i mekem prea se, "God, mi singaot i kam, se plis yu sevem mi, from nogud bae mi ded." (Sam 116:4) Be ol devel oli kam klosap long hem mekem Kristen i fraet mo i singaot bigwan i se, "Mi stap stanap long paoa blong God mo mi stap wokbaot i go." Nao hem i toktok olsem ia mo ol devel oli no moa kam klosap long hem.



*Kristen i wokbaot sloslo nomo i folem Stret Rod i godaon long ples ia Dakbus*

Long taem we san i kam antap, Kristen i bitim ples blong *Dakbus*. Afta hem i tanem raon mo i lukluk bakegen rod we hem i bin kam long hem long taem we ples i tudak.

Hem i luk smol rod we long wan saed i gat sofmad mo narasaed i gat bigfala hol i stap long hem. Mo tu hem i luk ol devel oli stap longwe. From we san i saen, ol devel ia oli no save kam klosap long hem.

# 15 Kristen i gud fren wetem *Strong Bilif*

Kristen i aot long *Dakbus* nao i go antap long wan smol hil. Afta hem i luk wan man i stap wokbaot i go fastaem long hem. Nem blong man ia, hem i *Strong Bilif*.

Kristen i singaotem hem se, “Eh, yu wet, from mi mi wantem wokbaot wetem yu.”

Be *Strong Bilif* i talem se, “Ei, sore, mi no save wet long yu, from enemi i stap kam biaen long mi blong kilim mi.”

Taem we Kristen i harem tok ia, hem i ron hariap nomo i go bitim *Strong Bilif*. Mo hem i ting se hem i smat blong mekem. Nao i no luklukgud rod blong hem, afta hem i kikim wan ston ale i foldaon. (1 Korin 10:12) Taem *Strong Bilif* i luk we Kristen i foldaon hem i go helpem hem. Nao i sekhan mo tufala i kam gudfala fren. Afta tufala i storian i go.

Kristen i askem long *Strong Bilif* se, “Wanem taem yu bin livim *Nogud Ples*? Yu kam fastaem o mi?”

Nao *Strong Bilif* i talem se, “Mi mi kam biaen, from we mi no wantem stap long *Nogud Ples*. Be mi no bin save se yu yu kam finis.”

Afta Kristen i askem se, “Yu bin harem nius blong man ia *Sofsof* o no?”

*Strong Bilif* i toktok i se, “Yes. Long taem we hem i go bak long vilej ol man oli jikim nogud hem mo sam oli kros long hem.”

Kristen i askem bakegen se, “Be long taem ia we yu no livim ples blong yu yet, yu bin toktok wetem *Sofsof* o no?”

*Strong Bilif* i talem se, “Long wan taem mi bin luk hem, hem i no bin wantem toktok long mi, from we maet hem i sem from we hem i bin folem yu, be afta hem i kambak bakegen. Be taem we mi aot long haos blong kam, mi no bin foldaon long Sofmad olsem yu. Mo tu, taem we mi kam long smol doa ia, *Enemi* long ples ia i no bin sperem mi. Be taem we mi wokbaot long rod blong kam mi luk wan yangfala gel, nem blong hem *Woman Long Rod*, mo hem i stap sidaon long rod. Woman ia hem i werem wan naes gras sket mo hem i mekem gud fes blong hem mo putum oel long skin blong hem we i smel naes. Hem i luk mi mo hem i traem switim mi blong mi go wetem hem. Be mi mi no wantem ol fasin ia we hem i stap mekem, i mekem mi no wantem nating blong lisin long ol toktok blong hem. Be hem i luk mi mo i stap tok nogud long mi.”

## 16 Olfala Tingting i testem Strong Bilif

Kristen i toktok bakegen long *Strong Bilif* i se, “Long taem we yu bin kam long *Stret Rod* yu no bin luk wan narafala samting bakegen?”

*Strong Bilif* i ansa se, “Taem we mi bin kam long stamba blong hil, mi bin luk wan man i stap, nem blong hem *Olfala Tingting*. Hem i kamaot long laen blong Adam, mo ples blong hem i *Fasin Giaman*. Mo *Olfala Tingting* i switim mi, blong mi stap wetem hem long haos blong hem, blong mi wok blong hem, mo tu hem i talem se, sipos we bae hem i ded, bae hem i givim ol samting blong hem i kam long mi. Be afta mi askem hem se, 'Be bae yu givim wanem samting?' Mo hem i talem se, 'Mi save givim mit mo fis mo

raes. Mo mi gat tri pikinini we trifala i ol gel nomo. Sipos yu wantem maredem wan, i oraet bae mi save givim long yu.' Afta hem i singaotem ol gel blong hem *Hae Tingting*, mo *Kavetem*, mo *Tingting i Antap*.” (1 Jon 2:16)

“Long fas tingting blong mi, mi bin wantem stap wetem *Olfala Tingting*, be afta, mi tingting gud. Taem tingting blong mi i kam klia, mi save se hem i bin wantem holemtaet mi blong mi kam wok-boe blong hem. Nao mi talem long hem se, “Olfala yu toktok tumas. Mo mi no wantem harem nating wanem we yu stap talem. Mo tu mi no wantem stap wetem yu long haos blong yu.”

“Taem we *Olfala Tingting* i harem ol strong toktok we mi talem, hem i jikim mi se, 'Yu yu wan strong hed, be i oraet bae mi sanem wan man blong i kam kilim yu ia.' Hem i stap toktok be taem mi tanem mi blong go, hem i holem strong mi long tufala han blong hem. I mekem mi harem se bae bun blong mi bae i brok, afta mi singaot se, 'Ei! Bae mi ded nao!' (Rom 7:24) Be mi kilimaot han blong hem mo mi ronwe i go antap long hil.”

*Strong Bilif* i talem long Kristen i se, “Mi stap klaem long *Hadwok Hil* be tingting blong mi i stap gobak long ol samting we *Olfala Tingting* i bin talem long mi. Afta mi luk wan man i holem wan stik, mo hem i ron hariap i kam from mi. Mo man ia i kam wipim mi gogo mi foldaon long graon olsem we mi ded. Mo taem we mi girap mi askem long hem se, 'Ei, be from wanem yu yu kilim mi olsem?’

“Hem i toktok i talem se, 'From we yu yu stap laekem ol toktok blong *Olfala Tingting*. Mo kaen tingting ia i stap haed long tingting blong yu. Loa blong God hem i blong soemaot

long yu weples nao yu stap mestem rod.' Man ia we i holem stik i talem olsem afta hem i kilim mi bakegen mo mi foldaon. Be mi girap bakegen nao mi talem long hem se, 'Ei, plis yu sore long mi, from nogud bae yu kilim ded mi wetem Loa ia.' Hem i wantem kilim mi ded be wan man i kam mo stopem hem."

Mo Kristen i askem se, "Huia man ia we i kam stopem narafala man ia we i stap kilim yu?"

*Strong Bilif* i talem long Kristen se, "Mi bin luk fes blong hem be mi no save se hem i hu, be biae mi luk mak blong nil long han blong hem mo mi luk save se hem i Jisas."

Kristen i talem long hem se, "Yu save? Man we i kilim yu wetem stik blong loa, hem i Moses. Taem we wan man i brekem loa blong God, bae Moses i no save sore long hem nating. Be Jisas nao hem i sore long ol sina man, mo gladhat blong God i mekem se hem i sanem Jisas blong hem i ded long kros, blong givim laef long ol man we oli putum tingting blong olgeta i stap long hem, mo oli biae long hem".

Afta Kristen i askem se, "Be yu bin luk wan man long ples ia *Tingting i Stap Daon*, o nogat?"

Strong Bilif i talem se, "Yes, mi bin luk wan man, nem blong hem, *No Glad*. Man ia i bin wantem se bae mi lego *Stret Rod* mo bae mi go bak wetem hem. Tingting blong man ia, hem i wantem traem go long ol narafala rod fastaem, mo sipos i luk se ol rod ia oli nogud, afta bae hem i jes tingting blong kambak long *Stret Rod*. Man ia hem i wantem leftemap nem blong hem wan, mekem se hem i no

laekem ples ia *Tingting i Stap Daon*. Afta i talem long mi se, 'Ol man blong ples ia oli no save leftemap nem blong mi.'"

Afta mi talem long hem se, "Be yu no sud leftemap nem blong yu. Yu mas mekem tingting blong yu i stap daon fastaem. Afta bae God nao i leftemap nem blong yu. Be sipos yu wan yu leftemap nem blong yu fastaem, bae God i mekem yu stap daon." (Proveb 16:18) Yumi mas tingbaot wan toktok blong King Solomon, we i talem olsem ia se, 'Hae nem i no wan samting blong yumi man yumi lukaotem. No gat. Taem we God i makem, bae hem i leftemap nem blong yumi.'"

Afta Kristen i askem se, "Be yu bin luk wan narafala samting bakegen o no?"

*Strong Bilif* i talem se, "Yes, mi bin luk. Mi bin luk wan man, nem blong hem *Sem*. Mo man ia i bin talem long mi, se hem i stap sem long bihaf blong ol man we oli stap folem *Stret Rod*. Hem i ting se ol man we oli nogat nem, olgeta nao oli stap folem *Stret Rod*. Be ol man we oli gat hae nem oli no wantem folem *Rod* ia. Nogat nao. Ol man olsem oli ting se oli strong, mo oli no save talem sore from ol nogud blong olgeta."

*Strong Bilif* i talem long Kristen se, "Mi mi no laekem man ia *Sem*, from hem i no wantem se bambae oli stretem ol nogud samting we hem i bin mekem."

Kristen i se, "Be yu bin talem wanem long *Sem*?"

*Strong Bilif* i talem se, "Fastaem tingting blong mi i no klia, blong bae mi talem wanem long hem, be afta mi talem

olsem long hem se, sipos yu save mekem gudfala fasin ol man bae i luk mo leftemap nem blong yu, be God i save hat blong yu. Ol samting we ol man oli ting se i gud, be long God hem i wan nogud samting yet. Mo tu mi talem long hem se sam man i wantem se God i king blong olgeta. I mekem oli folem hem, be ol defren man oli luk olgeta mo oli tingting se oli haf mad, be ol man we oli stap folem God oli gat save. Mo sipos mi lego *Stret Rod* mo mi folem rod blong yu, maet long taem we bae mi kasem Heven bae mi sem bigwan long fes blong God. (Mk 8:38) Mi toktok olsem long hem, afta mi lego hem mo mi wokbaot i go mo mi stap singsing."

## 17 *Toktok Tumas i lego Strong Bilif*

Taem *Strong Bilif* mo Kristen tufala i stap wokbaot i go, wan man i kam joenem tufala, we nem blong hem *Toktok Tumas*. Kristen i save fasin blong man ia finis, nao hem i no wantem kam klosap tumas long hem. Be *Strong Bilif* i talem long hem se, "Ei, brata, yu tu yu stap go long Heven?"

Afta *Toktok Tumas* i talem se, "Be hemia nao, yumitu stap go long sem ples nomo ia."

Afta *Strong Bilif* i talem se, "A, be i gud tumas. Ale yu kam, yumitu wokbaot mo storian tugeta i go."

Tufala i stap toktok i go, afta *Strong Bilif* i lego *Toktok Tumas* mo go klosap long Kristen mo i talem long hem se, "Man ia hem i wan gudfala man."



Be Kristen i talem long *Strong Bilif* se, “Nogat. Mi save talemaot fasin blong man ia long yu, from we mi mi save gud hem. Hem i kamaot long ples blong mi mo nem blong hem *Toktok Tumas*. Mo papa blong hem, nem blong hem *Swit Maot*. Toktok blong hem i gud, be long hat blong hem i gat wan defren tingting i stap.”

Afta *Strong Bilif* i toktok i talem se, “Ah, be hem i bin giaman gud long mi ia. Be bae mi lego hem olsem wanem? Naoia mi no wantem wokbaot wetem hem bakegen.”

Mo Kristen i talem long hem se, “Yu lisin long mi. Yu go bak mo toktok wetem hem long wan tok blong God. Afta yu



*Kristen mo Strong Bilif i mitim wan man we nem blong hem, Toktok Tumas.*

askem hem wanem nao hem i bilif blong hem. Mo tu, yu askem long hem se hem i save soemaot bilif blong hem long laef blong hem olsem wanem. Sipos yu askem olsem, ating bae hem i no moa gat samting blong talem nao, mo bae hem i no moa wantem wokbaot wetem yu.”

Nao *Strong Bilif* i go bak long *Toktok Tumas* mo i askem se, “Afta, yu?”

Mo *Toktok Tumas* i talem se, “Mi ting se yumitu toktok plante, be yu bin lego mi.”

*Strong Bilif* i talem long hem se, “Naoia yumitu save toktok. Mi wantem askem wan kwestin long yu se sipos yu savegud sore blong God, olsem wanem nao bae yu save soemaot samting ia long laef blong yu?”

Mo *Toktok Tumas* i talem se, “Sipos yu savegud sore blong God long laef blong yu, bae yu stap tok strong long ol narafala man blong oli lego ol sin blong olgeta.”

Be *Strong Bilif* i talem long hem se, “Be i moa gud sipos save blong sore blong God i mekem yu yu luksave sin blong yu, mo yu wan yu jenisim fasin blong yu fastaem.”

Mo *Toktok Tumas* i talem long hem se, “Be from wanem? Mi ting se blong tokbaot rod blong lego sin o blong lego sin long laef blong yu wan, tufala i semak nomo.”

*Strong Bilif* i talem long hem se, “No, i no olsem ia. Fulap man oli stap talem se yumi no mas mekem sin, be oli stap talem nomo long maot. Afta, oli stap mekem wanem we oli bin talem se oli no sud mekem. Ale, mi wantem save se yu stap soemaot bilif blong yu long laef blong yu, o hem i toktok nomo?”

Taem we *Toktok Tumas* i harem toktok ia hem i sem mo i talem se, “Ei, be from wanem nao yu askem toktok ia long mi?”

Afta, *Strong Bilif* i se, “Mi save ol fasin blong ol man olsem yu, we evri taem olgeta oli stap toktok tumas. Olgeta oli ol man we oli stap dring mo oli stap kavet mo oli stap tok flas mo oli stap giaman. Mo tu nating we olgeta oli stap wosip long God, be semtaem oli stap fraet long ol devel. Fasin we olgeta ia oli stap mekem i no stret nating!”

Be *Toktok Tumas* i toktok i talem se, “Eh, be naoia mi save fasin blong yu. Yu stap wantem blong jajem man, mo tu yu laekem blong stap skelem fasin blong man. Be tingting blong yu i nogud. Yu stap mekem olsem se yu wan gudfala man, be mi mi man nogud. I stret, mi taed long ol kaen toktok ia mo mi no moa wantem toktok long yu. Ale, bae mi go fastaem.”

Kristen i bin lisiin long ol toktok blong tufala, mo hem i luk we *Toktok Tumas* i lego *Strong Bilif* mo i go. Afta *Strong Bilif* i kam toktok wetem Kristen bakegen, mo Kristen i talem long hem se, “Yu luk save nao, mi bin talem long yu finis. Ol toktok blong yu mo ol toktok blong *Toktok Tumas*, i no sem mak. Hem i no wantem tanem tingting blong hem be hem i wantem lego yu nomo, mo i go. Fastaem mi ting se hem i yumitu we bae yumi lego hem, be hem i harem tok blong yu mo hem i sem mo hem nomo i go. I stret. Yumi no mas letem ol man olsem ia blong oli spolem yumi. Nogat! Yumi no mas go klosap long ol kaen man olsem ia.”

*Strong Bilif* i toktok mo i talem se, “Mi harem gud from we mi bin toktok wetem hem, mo sipos hem i no tanem tingting

blong hem, bae i stap long hem nomo.”

Afta Kristen i toktok i talem se, “I tru tumas, mo i gud tumas we yu bin toktok stret long hem olsem ia. Sipos ol narafala Kristen man i save toktok stret long ol man olsem, bae oli save holemtaet trutok mo bae oli save bilif strong long Jisas.”

Nao Kristen wetem *Strong Bilif* tufala i wokbaot i go, nao tufala i stap tokbaot gladhat blong God. Gudfala storian ia nao, i mekem se tufala i harem olsem se rod blong folem i go i no had tumas, i no gat ol bigfala ston long hem, mo tu san i no hot tumas.

## **18** *Ivanjelis* i mekem tingting blong tufala i strong.

Ale Kristen mo *Strong Bilif* i wokbaot mo luk *Ivanjelis* i stap wokbaot i kam. Afta Kristen i askem se, “Ei, gudfala fren blong mi, yu kam wea ia?”

Nao *Ivanjelis* i talem se, “Tufala brata, bae pis i stap wetem yutufala. Be yutufala i oraet? Wanem samting i bin hapen long wokbaot blong yutufala?”

Afta, Kristen mo *Strong Bilif* i talem long *Ivanjelis* ol samting we tufala i bin fesem long rod blong tufala. Nao *Ivanjelis* i talem se, “A, be hem i gud tumas. Mi glad tumas from we yutufala i bin winim ol samting we i stap traem yutufala. Be yutufala i save wan samting? God hem i putum wan gudfala presen blong yutufala we i no save nogud samtaem. Mekem se yutufala i mas gohed long *Stret Rod* blong kasem presen ia (Filipae 3:13 -14). Yutufala i ron

naoia go kasem mak blong karem presen blong yutufala. Be i gat wan samting we yutufala i mas mekem. Yutufala i mas lukaot gud long fasin blong yutufala, mo stanap strong mo wokbaot. Mo bambae yutufala i save stap gud wetem *Bigman* we i gat olgeta paoa long Heven mo long wol.” (Matiu 28:18)

Afta Kristen i talem se, “*Ivanjelis*, mi wantem talem tangkiu tumas long ol gudfala toktok blong yu, mo ol toktok ia bae i givhan bigwan long mitufala. Mitufala i save se yu wan *Ivanjelis* mo tu wan profet, mekem se yu save talem long mitufala ol samting we mifala i no luk yet we bae i kamaot long mitufala. Mo yu save soem mitufala long fasin blong daonem fraet mo blong winim ol samting nogud we bae i kam long mitufala.”

Nao *Ivanjelis* i talem se, “Tufala pikinini blong mi, yutufala lisiin long mi. Mi save se yumi evriwan i wantem go stap long ples blong God, be fastaem yumi mas fesem ol samting long laef we bae yumi harem nogud long hem. (Ol Wok 14:22) Klosap yutufala i bitim ples we i tudak be i gat wan moa ples bakegen i stap we i nogud olgeta mo i gud yutufala i lukaot. Bae i gat sam samting blong traem yutufala long ples ia, olsem bae i gat fulap enemi i stap. Mo taem we yutufala i go insaed long ples ia bae ol enemi oli wantem fasem yutufala mo kilim yutufala. Be yutufala i mas holem taet bilif blong yutufala gogo yutufala i ded. Mo God bae i givim presen we hem i laef long yutufala.” (Revelesen 2:10)

# 19 Tufala i fesem had taem long taon we oli tingaotem Tudak

Kristen mo *Strong Bilif* i wokbaot i go kasem wan taon we oli singaotem *Tudak*. Taon ia i bigwan mo ol man blong hem oli wantem ol narafala man i tinghae long olgeta. Olgeta oli no stap tinghevi se ol samting blong wol ia i blong sot taem nomo (2 Korin 4:18) mo oli stap wokhad blong gat ol samting we bae i finis hariap. Olgeta evriwan i gat sem tingting nomo. (Jemes 1:11, 3:13-14) Mo tu long taon ia, oli stap singsing long ol kastom singsing. Taem oli stap singsing, semtaem oli stap kilim pig blong mekem kastom long man we i ded, blong kastom i kam strong moa.

Ol man oli bilif se ol devel bae oli luk pig we ol man oli kilim mo bae oli glad long hem, mekem se bae oli no spolem ol man. Kastom singsing hem i no wan niufala samting. Nogat. Long taem bifo i kam ol man oli stap mekem singsing ia. I gat wan jif blong ol devel we hem nao i faswan blong mekem singsing ia. Nem blong jif blong ol devil ia hem i *Bielsebul*, mo narafala nem blong hem, hem i Setan. (Matiu 10:25, 12:24)

*Bielsebul* i save se *Stret Rod* blong go long Heven, hem i stap klosap long taon ia *Tudak* mo hem i wantem ol man we i folem *Stret Rod* i kam long ples blong hem fastaem. Hem i wantem olgeta i kam blong oli save luk ol singsing, mo ol fasin blong olgeta, mo bae oli stap glad tumas long ol samting blong wol ia. *Bielsebul* i wantem se ol man we oli kam long taon blong hem oli fogetem *Stret Rod* mo oli no moa go folem rod ia bakegen.



*Kristen mo Strong Bilif i kam kasem wan taon we oli  
singaotem Tudak*

Nao Kristen mo *Strong Bilif* tufala i wokbaot i go stanap long medel long ol man we oli stap singsing. Ol man oli go klosap long tufala, mo oli luk klos blong tufala mo luksave se tufala i blong wan defren ples. Afta oli askem tufala se, “Yutufala i wanem kaen man?” Tufala i save lanwis blong Heven, mekem se taem tufala i toktok ol man oli haremsave se tufala i no man blong ples ia.

Wan man, nem blong hem *Kaon* i talem long tufala se, “Yutufala kam, yumi stap tugeta.”

Be tufala i sarem ae mo prea olsem se, “Papa God, yu helpem mitufala blong tanem baksaed blong mitufala long ol samting blong wol from we oli blong sot taem nomo.”

Ale, narafala man blong singsing we nem blong hem *Danis*, i luk tufala mo i askem se, “Be, yutufala i stap folem wanem rod ia?”

Mo tufala i talem se, “Mitufala i stap folem trutok blong God mo wokbaot long *Stret Rod* blong kasem Heven. (3 Jon 4, 1 Timoti 2:4)

Taem we ol kastom man oli harem toktok ia oli harem nogud long Kristen mo *Strong Bilif*, from we toktok blong tufala i soemaot se tufala i no wantem stap wetem olgeta, mo tu, tufala i no wantem folem fasin blong wol. (Filipae 3:20) Ol man ia oli stap lukluk tufala mo oli no laekem tufala, mekem se oli stap tokbaot tufala. Sam man oli laf long tufala mo sam oli kros nogud, mo sam oli wantem kilim ded tufala. Nao plante man oli kam wanples mo oli toktok bigwan from we oli kros. Afta, wan narafala man, nem blong hem *Mekem Ofa*, hem i kam blong karem tufala i go long kot, from we hem i ting se sipos tufala i blokem ol kastom fasin bae i gat trabol long taon ia.

Wan Polis i kam mo i putum hankaf long han blong Kristen mo *Strong Bilif*, mo i putum tufala long wan klia ples mo askem tufala se, “Yutufala i bin mekem wanem?”

Be tufala i talem se, “Mitufala i wantem kam blong stap smoltaem nomo long ples ia. Tingting blong mitufala i stap finis long wan narafala ples, we oli singaotem Heven, (Hibrus 11:13, 1 Pita 2:11) mo mitufala i no bin mekem wan nogud samting nating long ol man long taon ia.”

Ol man oli no wantem blong bilivim wanem we Kristen mo *Strong Bilif* i bin talem. Olgeta oli ting se tufala i krangeke mo tufala i kam blong spolem taon ia. From samting ia ol



man oli kikim baksaed blong tufala mo pusum tufala olbaot. I mekem ol klos blong tufala i doti. Afta, ol Polis oli tekem tufala i go sakem tufala long kalabus, mo sam man oli kam luk tufala mo laf mo spet long tufala. Ol Polis tu oli nogat sore long tufala i mekem se oli stap laf mo tok kros long tufala.

Be Kristen mo *Strong Bilif* tufala i no givim bak wanem we ol man ia oli mekem long tufala. (1 Pita 3:9) Tufala i wet nomo blong go long kot. Sam man oli luk we tufala i no faet bak nating, mo oli sore tumas long tufala. Olgeta we oli harem se oli sore, oli wantem blokem ol man we oli wantem faetem tufala. Mekem se i gat tu grup nao tufala grup i wantem faet wetem tufala. (Jon 10:19) Nao from we tufala grup i stap faet, ol *Polis* oli kros long Kristen mo *Strong Bilif* from oli ting se tufala i stamba blong faet ia.

Ol *Polis* oli talem long ol man se, “Yufala i wipim nogud tufala long rop.”

Afta we oli wipim Kristen mo *Strong Bilif*, tufala i harem bodi blong tufala i soa we i soa, be tufala i fogivim ol man we oli stap mekem nogud long tufala mo tufala i no kros. Taem oli mekem olsem plante man oli luk fasin blong tufala mo oli wantem kam olsem tufala. Be jif blong singsing i singaotem tufala i go long kot from we hem i wantem kilim ded tufala. Ale, tufala i stanap long kot mo jaj i stap lisiin long tufala.

Nem blong jaj hem i *Nogud Tingting*. Hem i talem se, “Yutufala i bin mekem tri nogud samting. Fas samting, yutufala i no laekem ol fasin blong ol man we oli stap long *Tudak*. Nambatu samting, yutufala i seraotem ol man long

taon ia. Mo nambatri samting, yutufala i daonem nem blong *Bielsebul*.

Be naoia *Strong Bilif* i stanap strong mo hem i no fraet nating.

Nao i talemaot long kot se, “Hem i tru we mi agensem wok blong *Bielsebul* from we nogud spirit ia hem i enemi blong Tabu Spirit blong God. From samting ia mi wantem daonem nem blong *Bielsebul* mo ol wokman blong hem. God nomo hem i King blong wol ia, be i no Setan.”

Afta jaj, we nem blong hem *Nogud Tingting*, i singaotem sam man we oli stap long taem ia. I gat tri long olgeta, we nem blong olgeta, *Hiten Man*, *Devel Man* mo *Posen Man*. Trifala i glad nomo blong oli witnes agens long Kristen mo *Strong Bilif* long fored blong jaj.

Fas man we i toktok hem i *Posen Man*, mo hem i talem se, “*Strong Bilif* i spolem singsing finis. I mekem se singsing ia i no moa save mekem se yumi joengud.”

Afta, narafala man we nem blong hem *Devel Man* i talem se, “Mo tu hem i bin jikim *Bielsebul* we hem i jif blong singsing.”

Mo las man we nem blong hem *Hiten Man* i talem se, “Hem i bin blokem yumi blong no mekem ol kastom fasin.”

Be *Strong Bilif* i talem long jaj se, “Jaj, ol man oli stap tokbaot mi, be ol toktok ia oli giaman evriwan. (Matiu 5:11) Wanem nomo we mi bin talem i olsem, i gat samsamting long kastom we i no stret long ae blong God, olsem ol nogud fasin, we Baebol i tokbaot blong ol man oli no mekem. Mo i tru se *Bielsebul* hem i enemi blong God.

Yufala i no save folem *Bielsebul* mo God semtaem. I no olsem ia.” (1 Korin 10:21)

Afta we *Strong Bilif* i toktok, hem i luk se ol man oli plante, mekem se hem i prea, i talem se, “God yu sore long mi.” (Luk 17:13) Long taem blong kot i bin gat fulap man oli bin kam blong lisin long jaj mo tu long ol witnes. Sam man we oli bin stap long kot i gat, *Brekem Loa, Fasin Tudak, Tok Flas, Laekem Tudak* mo *Hambag*.

Jaj wetem *Bielsebul* tufala nomo i go toktok blong traem faenemaot wan samting blong mekem se oli save kilim ded tufala. (Ol Wok 5:33) Long taem ia, ol man nogud oli wokbaot i go mo terem ol klos blong Kristen mo *Strong Bilif*. Ol man oli wipim tufala long stik, mo sam oli stonem tufala long ston. Be i gat sam man oli stap kros long tufala mo oli karemaot tufala long kalabus mo ronem tufala i go aotsaed long taon.

Tufala i harem bodi blong tufala i soa, nao tufala i luk wan lif haos, nao tufala i go slakem tufala insaed long smol haos ia. Mo tufala i tingbaot ol toktok blong *Ivanjelis*, mo tu tufala i tingbaot ol harem nogud blong Jisas. (Ol Wok 9:16) Tufala i talem tangkiu long God from we tufala i harem nogud olsem we Jisas i bin harem. (Ol Wok 5:41)

Be long naet sam man oli kam bonem haos we tufala i slip long hem. Kristen i girap mo ronwe, be *Strong Bilif* i harem bodi blong hem i soa tumas, i mekem hem i no save girap kwiktaem blong ronwe. *Strong Bilif* i stap luk we faea i stap bonem hem, nao i singaot bigwan mo i prea se “Papa God, yu fogivim ol man ia we oli mekem fasin ia.” (Ol Wok

7:60) Taem hem i toktok finis, faea i laet bigwan mo i bonem hem i ded.

Ol kastom man i bin bonem ded *Strong Bilif*, be oli no save spolem spirit blong hem. Oli bin kilim bodi blong hem nomo. (Matiu 10:28) Long taem we hem i ded, wan enjel i tekem spirit blong hem i go long Heven blong hem i go stap wetem God. (Luk 16:22)

## 20 Samting blong wol i testem tufala

Ol man long taon ia oli lego Kristen, mo hem i wokbaot bakegen long *Stret Rod*. Be fren blong hem *Strong Bilif* i no bin go wetem hem, from hem i bin go fastaem finis mo i stap long Heven. I mekem Kristen hem wan nomo i go. Be hem i save se ol samting long wol hem i blong God, mekem se God nomo i save blokem ol man nogud blong oli no spolem hem.

Taem we Kristen i stap wokbaot, wan man i kam luk hem mo i wokbaot wetem hem i go long *Stret Rod*. Nem blong man ia hem i *Wet Long God*. *Wet Long God* i luk ol fasin blong Kristen nao hem i tingting blong i folem hem from we hem tu i wantem go long Heven. Be hem i stap wet long stret taem blong God i mekem samting ia i kamtru. (1 Korin 13:7)

Kristen wetem *Wet Long God*, i talem se bae tufala i gud fren mo bae tufala i wokbaot i go tugeta long rod we i stap go long Heven. Afta, *Wet Long God* i talem long Kristen se, "I no mi wan nomo long taon ia *Tudak* we i wantem go long Heven. I gat fulap man we oli stap singsing long ol kastom

singsing, be oli stap wantem tu blong kam folem yumitu. Sam oli wantem lego ol fasin blong *Tudak* mo folem *Stret Rod*.”

Taem we tufala i stap wokbaot i go tufala i mitim wan olfala man. Nem blong man ia hem i *Mane*. Nao Kristen mo *Wet Long God* i askem long *Mane* se, “Be yu blong wea? Mo yu stap wantem go wea?”



*Naoia, Kristen mo Wet Long God i wokbaot long Stret Rod*

*Mane* i talem long tufala se, “Mi bin lego ples ia *Swit Toktok*, from mi wantem go long Heven. Papa blong mi mo ol famle blong mi i gat plante samting mo mi tu mi wan bigfala man long ples blong mi. Famle blong mifala i bigwan i bitim ol narafala famle. Tingting blong mi i semak long olgeta we oli stap folem *Stret Rod*. Be tufala samting nomo i defren. Faswan, mifala i wantem wan isi laef we mifala i no wok had tumas mo mifala i no safa. Mo nambatu tingting we i defren hem i olsem, mifala i ting se man i sud kam bigman fastaem mo karem plante samting blong hem, afta hem i save folem *Stret Rod*.”


*Mane* i no talemaot nem blong hem yet, be Kristen i harem ol toktok blong hem afta i askem long man ia se, “Be nem blong yu *Mane*, no?”

*Mane* i toktok i talem se, “Nem ia i no stret nem blong mi. Ol man long ples blong mi oli singaot mi long nem ia. Be mi mi wantem go wetem yutufala. Yumi wokbaot long *Stret Rod*.”

Afta Kristen i talem long hem se, “Bae yu no save ronwe long harem nogud mo hadwok. Mo bae yu no mas sem long ol pua man. Yu mas sore long olgeta.”

Taem *Mane* i harem ol toktok ia hem i no moa wantem folem Kristen mo *Wet Long God*, i mekem hem i wokbaot sloslo biae long tufala. I no longtaem, nao tri man i kam mo mitim hem. Nem blong trifala man ia hem i *Karem Samting*, *Lukaotem Samting*, mo *Karem Mane*. Ol trifala man ia oli sekhan long fren blong olgeta ia *Mane*. Olgeta evriwan i bin skul long wan skul nomo, taem we oli smol.

Mo nem blong tija blong olgeta hem i *Man Blong Kros*. *Man Blong Kros* hem i save tijim ol samting we i blong wol. Mo tu hem i bin talem long ol pikinini we hem i tijim se, “Yumi mas wok had blong gat ol samting blong wol ia. Yufala save folem eni rod blong karem ol samting ia, from sipos yufala i gat ol samting blong wol ia, bae i moa gud. Yufala i save mekem eni samting blong gat ol samting ia blong wol ia. Olsem yufala i save giaman mo tu talem ol swit toktok, o kilim man, mo semtaem go long wosip long



*“Tingbaot woman blong Lot”*

jos blong yu. Be evritaem yufala i mas gat strongfala tingting blong karem ol samting. Sipos no, ating yu no save karem.”

Ale *Mane* i talem long trifala man ia se, “Yu save? Kristen mo *Wet Long God* tufala i no tingbaot nating ol samting blong wol, o blong karem ol kaen samting olsem. Nogat! Mo yumi evriwan i wantem blong karem hae nem be tufala i no wari long samting ia from we tufala i stap folem rod blong go long Heven. Sipos rod i longfala tumas, mo tudak i kam, o wota i strong, sipos wan i sik, ating bae tufala i wokbaot nomo i go, from we tufala i stap tingting long God nomo. Tufala i no stap tingbaot nating ol samting blong wol ia. Be i no mi, nogat! Mi mi no wantem mekem olsem. Mi stap lukaotem gud mi. Mi ting se fasin blong gat mane i moa gud. Sipos ol man oli leftemap nem blong mi, afta bae mi jes go wosip. Be sipos ol man oli no mekem gud long mi, bae mi no go wosip. Fas samting we mi wantem mekem hem i blong lukaotem ol samting blong mi. Sipos mi stap gud, mi rere nao blong folem *Stret Rod* ia.”

Taem we oli toktok finis, oli wokbaot hariap nomo blong kasem Kristen mo *Wet Long God*. Afta oli talem wan stori olsem ia se, “I gat wan man i kam be hem i wantem gat ol samting blong wol ia fastaem. Man ia i wantem gat blesing, mekem se hem i go wosip long Sande. Be hem i no kasem wan tok blong God long wosip mekem se hem i no folem. Afta hem i stap tingting blong go long wan kampani blong askem wok, mo bae hem i talem long bos se, ‘Mi mi wan gudfala man, from mi man blong go long jos.’ Mo bos bae i ting se man ia hem i wan gudfala man, mo bae hem i givim



wok long hem. Be man ia i no talemaot long bos se hem i go long jos from we hem i wantem karem bigfala mani.”

Afta fofala man ia i askem long Kristen se, “Fasin blong man ia i stret o nogat?”

Kristen i talem se, “Be olsem wanem sipos mi askem long wan man we i no save samting, ating bae hem i save talem stret ansa long mi tu! Long Baebol i gat sam kaen man we oli olsem ia. Taem we Jisas i stap long wol ia, fulap man oli biae long hem blong karem kakae long hem. (Jon 6:26) Be oli no gat tingting blong folem tok blong hem. Sipos man i giaman nomo blong folem stret fasin blong kasem ol samting blong wol ia, be hem i no folem tok blong God, fasin ia hem i nogud we i nogud.”

Taem fofala man blong wol oli harem ol toktok ia, oli tingting plante. Nao oli no moa toktok. Olgeta oli no moa wantem wokbaot wetem Kristen mo *Wet Long God*.

Kristen mo *Wet Long God* i folem rod i go, nao tufala i storian long tufala se, “Sipos ol man ia oli no save folem tru tok blong God, bae oli ronwe long panis blong God o no? Ating nogat ia.”

Tufala i go klosap long wan ples we oli talem *Wantem Mane*. (1 Timoti 3:3) Long ples ia i gat wan man i stap, we nem blong hem *Dimas*. (2 Timoti 4:10) *Dimas* i singaot long tufala se, “Ei, yutufala i kam. Mi mi wantem soem rod we bae yu gat fulap mane.”

Be *Dimas* i no save winim Kristen mo *Wet Long God* from we tufala i no wantem lego *Stret Rod* blong go lukaotem ol mane ia. Be i no longtaem *Mane* wetem ol

trifala fren blong hem oli kamtru, oli lego *Stret Rod* nao oli folem *Dimas* mo oli nomo kambak long *Stret Rod*.

Nao Kristen mo *Wet Long God* i folem rod i go, ale, tufala i kam long wan ples we tufala i luk wan ston we i olsem wan pija blong wan woman. I gat wan toktok we oli raetem long ston mo tufala i ridim. Toktok ia i talem olsem “Tingbaot woman blong Lot”. (Luk 17:32) Mo taem we tufala i lukluk gud ston ia oli luk se hem i no wan ston, be hem i olsem wan ston we sol i kavremap! Nao tufala i tingbaot stori blong Lot. (Jenesis 19:23-26)

From longtaem bifo God i bin spolem taon ia Sodom wetem ol man nogud we oli stap long ples ia. Be Lot wetem woman blong hem oli ronwe. Be woman blong Lot i wantem tumas ol samting blong Sodom, mo i no lisin long ol toktok blong God, i lukluk i go bak long Sodom, nao hem i jenis i kam olsem wan ston we sol i kavremap.

Kristen mo *Wet Long God* i wokbaot i go nomo long *Stret Rod* nao oli kam long wan wota. Mo nem blong wota ia hem i, *Wota We i Stap Laef*. (Revelesen 22:1,2) Tufala i glad tumas blong luk wota ia wetem ol gudfala tri mo ol naes flaoa we i stap gru long saed blong wota. Wota ia i bigwan, mo i stap saen olsem glas.

Tufala i go sidaon long ol gudfala gras, ale, tufala i dring wota mo tufala i spel. Ol tri we oli stap long saed blong wota oli karem fulap frut, mo tufala i karem sam long ol frut ia nao tufala i kakae. Mo tufala i no fraet long wan samting. (Sam 23:2)

## 21 Tufala i taed long rod we i gat ston long hem

Tufala i slip smol afta tufala i girap mo wokbaot bakegen. Leg blong tufala i soa, from we tufala i bin wokbaot longwe, i mekem tufala i taed tumas blong wokbaot long ol ston we i stap long *Stret Rod*. Naoia tufala i stap tingting blong lukaotem wan rod we bae tufala i no save harem nogud long hem. (Namba 21:4-5)

Ale tufala i luk wan rod long raethan saed we hem i wan bigfala rod we oli singaotem se *Ronwe Long Ol Harem Nogud*. Rod ia hem i stap klosap long saed blong *Stret Rod* i mekem se Kristen i wantem tumas blong wokbaot long hem.

Rod ia, *Ronwe Long Ol Harem Nogud*, i no gat ol bigfala ston long hem, nao tufala i wokbaot i go long hem mo leg blong tufala i no moa soa. Tufala i laekem rod ia tumas. I gat wan ples we tufala rod ia, *Stret Rod* mo *Ronwe Long Ol Harem Nogud* i kam mit long hem. Long ples ia wan man i kam, we nem blong hem *Giaman Bilif*. Nao hem i talem long tufala se, “Yutufala i kam, yumi folem rod ia, *Ronwe Long Ol Harem Nogud* mo bambae yumi kasem Heven yet.”

Tufala i bilivim ol tok blong man ia i mekem tufala i folem hem. I no longtaem san i go daon nao ples i tudak. *Giaman Bilif* i tekem tufala i go, mo i soem rod long tufala. Be hem i mestem rod mo i foldaon i go long wan hol we i godaon we i godaon, nao hem i brekem ol bun long bodi blong hem. Hem i singaot bigwan, be kwiktaem nomo hem i ded.

Kristen mo *Wet Long God* i harem *Giaman Bilif* i singaot nao tufala i singaot bak mo askem hem se hem i olsem wanem. Be tufala i no moa harem hem i singaot bakegen. Nao ples i kam tudak olgeta. Mo long naet ren i ren bigwan mo tanda i faerap.

Nao tufala i lukaotem *Stret Rod* bakegen be tufala i no faenem. (Jeremaea 31:21) Tufala i no moa save go bak nao long *Stret Rod*, mekem se tufala i folem rod ia nomo. Be tufala i faenem se rod ia i had tumas. Tufala i tingting se blong lego *Stret Rod* i isi nomo, be blong gobak long hem i had tumas. Ale, tufala i wokbaot gogo, tufala i taed. Afta tufala i go insaed long wan hol blong ston antap long hil, mo tufala i wet blong i delaet. Be tufala i harem long tufala se tufala i taed tumas i mekem se tufala i slip kasem moning.

## 22 Bigfala man olgeta, *Meksave Man*

Long moning tufala i go blong lukaotem rod bakegen. Long ples we tufala i stap slip long hem i gat wan fanis blong wan man. Man ia hem i wan bigfala man olgeta mo nem blong hem i *Meksave Man*. Bigfala man ia i stap long wan strong haos we oli singaotem *No Stap Gud*.

Nao long moning bigfala man ia, hem i stap wokbaot aotsaed long haos blong hem, mo i stap lukaotem ol man blong i spolem olgeta. Be taem we hem i stap lukluk raon hem i luk Kristen mo *Wet Long God* tufala i stap wokbaot insaed long yad blong hem. Hem i go klosap long tufala nao i kros tumas. Hem i toktok i talem se, “From wanem nao yutufala i kam insaed long yad blong mi?”

*Meksave Man* i toktok bigwan i mekem Kristen mo *Wet Long God* i fraet tumas.

Afta tufala i talem se, “Mitufala i bin lusum rod mo kam mo folem fanis ia be mitufala i no save se hem i fanis blong yu.”

Taem bigfala man i harem tok blong tufala, hem i kilim nogud tufala wetem wan bigfala wud mo hem i karem tufala i go long haos blong hem. Long saed blong haos i gat wan kalabus mo bigfala man i sarem tufala long kalabus ia. Tufala i stap insaed long ples ia kasem tri dei. Nao tufala i harem nogud tumas from we i no gat mat blong slip long hem, mo tu i nogat kakae mo wota blong dring. Tufala i stap nomo olsem ia. Afta tufala i tingting tumas long harem nogud blong tufala nao oli talem se, “Ating bae yumitu ded long ples ia nomo.”

*Meksave Man* i lego tufala i stap long kalabus afta i gobak long haos blong hem blong i toktok wetem woman blong hem. Nem blong woman blong hem hem i *Nogat Sore*. *Meksave Man* i talem long woman blong hem se, “Mi bin holem tu man mo mi putum tufala insaed long kalabus from we tufala i bin stap wokbaot insaed long yad blong mi.”

Taem woman blong hem i harem toktok blong man blong hem, hem i no sore nating long tufala. Woman blong hem i talem se, “Mi mi no wantem save long tufala tu from hem i fol blong tufala. Yu go kilim nogud tufala mo yu no sore long tufala.”

Tumora moning blong hem *Meksave Man* i go long kalabus mo i kikim baksaed blong tufala mo i wipim tufala bakegen. Tufala i harem nogud tumas, i mekem se tufala i

no moa save stanap, mo sidaon, o slip bakegen. Tufala i harem i soa tumas long bodi blong tufala. Bakegen hed blong tufala i soa, mo skin blong tufala i hot. Be tufala i no bin talem wan toktok nogud long bigfala man ia. Tufala i toktok gud nomo. (1 Korin 13:4-7)

Long narafala dei woman blong bigfala man ia i talem se, “Sipos Kristen i fasem rop mo hangem nek blong hem, bae mi no wantem save tu. Mo sipos *Wet Long God* tu i mekem olsem i gud moa.”

*Meksave Man* i go bak long kalabus folem ol toktok blong woman blong hem, mo i talem long Kristen mo *Wet Long God* se, “Bae yutufala i no save ronwe long kalabus ia. Ei Kristen, i moa gud yu fasem rop long nek blong yu mo hangem yu wan. Afta hem i talem sem toktok ia long *Wet Long God* blong hem tu i mekem sem samting.” (Job 7:15)

Nao Kristen i harem tok ia, hem i tingting mo i talem se, “Ating toktok blong hem i tru ia.” Be Kristen i gat tu tingting long maen blong hem se, “Be God i lego mi finis o hem i stap wetem mi yet?” Tingting ia i mekem hem i no moa save.

Kristen i stap tingting tumas gogo, hem i tingting blong hangem nek blong hem. Be hem i sore long *Wet Long God*, i mekem se hem i jenisim tingting blong hem. Mo *Wet Long God* tu i gat sem tingting olsem Kristen.

Biaen woman blong bigfala man ia i talem long man blong hem se, “Yu go tekemaot tufala man ia long kalabus mo yu soem ol bun blong ol ded man we fastaem oli bin stap long kalabus. Mo yu talem long tufala se afta wan wik, bambae ol bun blong yutufala oli stap long ples ia.”

Afta bigfala man i go tekem Kristen mo *Wet Long God* i go luk ol bun ia. Tufala i luk mo oli seksek tumas. Taem tufala i luk ol bun ia, tufala i askem long tufala se, “O, be ating ol bun blong yumitu bae i olsem ia, ah? From hem i wantem kilim ded yumitu ia? Ating God i taed blong



*Bigfala man olgeta, nem blong hem, Meksave Man, i kilim nogud tufala long wan bigfala pis wud*

lukaotem yumitu finis? Yumitu i lego *Stret Rod* finis, be ating wan man bae i kam soem rod ia bakegen long yumi? Yumi no moa save go long Heven nao, o olsem wanem?" Tufala i bin tingting plante be bilif blong tufala i strong yet.

Bigfala man ia i lukluk fes blong tufala mo bodi blong tufala we i kam bunbun olgeta be hem i no save se tingting blong tufala i olsem wanem. Hem i gobak long haos mo i talem long woman blong hem se, "Tufala i luk finis ol bun blong ol ded man, be tufala i no bin fraet nating. I olsem we tufala i stap wet blong wan man bae i kam karemaot tufala long kalabus. Mo mi no save se tufala i stap holem wan ki blong openem lok o i nogat. Mi ting se maet oli gat."

Long aftenun bigfala man i go luk tufala long kalabus blong i lukaotem ki long poket blong tufala. Be hem i no bin faenem. Long naet, bigfala man wetem woman blong hem i stap slip long haos blong tufala, be Kristen mo *Wet Long God* i stap sidaon mo toktok long kalabus se olsem wanem nao bae tufala i save kamaot long kalabus.



Be Kristen i talem long *Wet Long God* se, "A, naoia mi tingbaot. Mi holem wan ki blong wan lok ia, mo ki ia nem blong hem *Promes*. Maet ki ia i save openem doa long kalabus ia." (Hibus 4:1)



Taem *Wet Long God* i harem tok blong Kristen, hem i girap kwiktaem, mo i talem se, “Ei, yu givim ki, yu givim ki! Bae mi traem long lok ia!”

Kristen i karemaot ki blong *Promes* mo hem i traem long lok. Taem hem i traem, nao lok i open! Ale, tufala i girap, mo tufala i wokbaot sloslo nomo i go mo lego kalabus. Be i gat wan narafala doa bakegen i stap, we i stap long fanis. Mo taem Kristen i traem ki bakegen be doa i open. Tufala i bin hadwok lelebet blong openem doa be tufala i winim. Be taem we tufala i openem doa, insis blong doa i faerap bigwan.

Nao Kristen mo *Wet Long God* i save se bigfala man bae i harem noes ia mo bae i kam hariap blong ronem tufala. Mekem se tufala i ronwe kwiktaem nomo. I tru se bigfala man i bin harem samting we i faerap, mo hem i girap i ron i go blong holem Kristen mo *Wet Long God* be hem i spid tumas i mekem hed blong hem i raon mo hem i foldaon.

Be Kristen mo *Wet Long God* i ronwe i go. Kristen mo *Wet Long God* i ron i go mo kamaot bakegen long *Stret Rod*. Taem tufala i kasem *Stret Rod* ia tufala i tingting plante long ol samting we tufala i kamaot long hem. Mo tufala i talem se, i nogud bae ol narafala man i go long ples ia mo bae bigfala man i kilim olgeta. From samting ia tufala i raetem wan notis blong blokem ol man blong oli no go insaed long rod ia from hem i ples blong harem nogud moa. Tufala i raetem toktok olsem, “Yu no mas go long narafala rod ia we hem i *Ronwe long Ol Harem Nogud* from we i gat wan man we bae hem i sarem yu long kalabus blong hem.”

Tufala i raetem finis mo putum long wan ples we ol man bae oli save ridim.

## 23 Kristen mo *Wet Long God* i luk fo hil

Tufala i lego ples we oli putum notis long hem, nao tufala i folem *Stret Rod* mo wokbaot i go kamaot long *Harem Gud Hil*. Fastaem Kristen i luk we hil ia i longwe be naoia hem i kasem hil ia. Ona blong graon ia hem i wan man blong God. Long ples ia hem i mekem wan gudfala garen blong ol man we oli bilif bae oli save kam long hem. Long garen ia i gat fulap tri we oli karem plante frut blong kakae mo tu i gat ol anamol i stap long hem.

Kristen mo *Wet Long God* i wokbaot i go mo sidaon long wan gudfala sado mo tufala i spel. Tufala i save se ol enemi bae oli no save lukaotem tufala long ples ia, i mekem se tufala i sidaon mo kakae ol frut ia.

Antap long hil i gat sam man we oli stap lukaot long ol sipsip. Nem blong olgeta hem i *Save*, mo *Stanap Strong*, mo *Stret Fasin*, mo *Ae i Open*. Kristen mo *Wet Long God* i luk plante sipsip i stap long hil, nao tufala i askem long ol man ia se, “Be ol sipsip ia i blong huia?”

Ol man ia oli ansa bak se, “Hil ia wetem ol sipsip ia oli blong God.”

Afta ol man blong lukaot long sipsip i tekem tufala i go long haos blong olgeta mo givim kakae long tufala, mo biae oli soem ples blong slip long tufala. (Hibrus 13:2) Ol man blong lukaot long sipsip i talem long tufala se, “Yutufala i slip fastaem, afta bae yutufala i jes go.”

Long moning, fofala man ia i tekem Kristen mo *Wet Long God* blong lukluk ples. Nao oli wokbaot i go mo oli luk sam samting. Mo oli klaem i go antap long wan hil we oli singaotem *Mestek Hil*.

Taem we oli kasem hil ia mo lukluk i godaon, tufala i luk



*Oli klaem i go antap long wan hil we oli singaotem Mistek Hil*

fulap bun blong ol ded man. From fastaem i gat sam man oli bin liv long hil ia mo oli bin foldaon i go long hol ia nao oli ded. Kristen i luk nao i askem long olgeta se, “Be olsem wanem nao samting ia i hapen?”

Nao ol man blong lukaot long ol sipsip oli talem se, “Ol bun ia i blong ol man we oli bin lego trutok mo stret fasin blong God, mo oli bin foldaon long hol ia mo oli ded.”

Afta ol man blong lukaot long ol sipsip oli wokbaot i go wetem Kristen mo *Wet Long God* long wan narafala hil we oli kolem *Hil Blong Lukaot*. Mo antap long hil ia i gat ples blong berem ol man i stap, mo long ples ia i gat fulap blaen man i stap wokbaot.

Kristen i luk ol man ia we oli blaen, nao i askem long ol man blong lukaot long ol sipsip se, “Be from wanem ol blaen man ia oli stap long beregraon?”

Nao ol man blong lukaot long ol sipsip oli talem se, “Bifo ol man ia oli ting se i had tumas blong folem *Stret Rod* mekem se oli lego rod mo go olbaot. Oli no bin lukaot gud long wokbaot blong olgeta, i mekem oli folem rod ia *Ronwe long ol Harem Nogud*. Nao long ples ia, bigfala man ia *Meksave Man* i bin holem ol man mo i spolem bilif blong olgeta, i mekem se oli no moa save lukluk. Nao olgeta ia oli stap wokbaot olbaot long beregraon nomo.” Kristen wetem *Wet Long God* i harem ol toktok ia nao tufala i tingting plante from klosap tufala tu bae i olsem ol blaen man ia.

Ol man blong lukaot long ol sipsip oli openem wan doa long wan hol blong ston, mo olgeta ia oli talem long tufala blong go lukluk insaed. Nao insaed tufala i luk we ples i smok mo faea i stap bon. Oli smelem smok ia i nogud we i

nogud, mo tu oli stap harem we ol man oli stap krae from we oli harem nogud tumas.

Afta Kristen i askem se, “Be wanem samting ia?”

Ol man blong lukaot long ol sipsip oli talem se, “Hemia hem i doa blong Hel. Naoia yumi stap harem ol man ia oli stap krae bigwan. Sore tumas, be hemia ol man we bilif blong olgeta i giaman nomo mo olgeta i gat tu tingting. Tingting blong olgeta i blong lego *Stret Rod* mo folem ol softala rod. Mo tu sam man we oli no gat tru bilif, oli stap giaman, oli stap stil mo ol fasin blong olgeta i mekem se oli no save stap long taem. (Ol Wok 5:5) Oli no bin wantem folem singaot blong God from we oli no wantem folem *Stret Rod*.”

Kristen i askem long ol man blong lukaot long ol sipsip se, “Be huia nao ol giaman man blong Bigman?”

Mo olgeta oli talem se, “Ol giaman man blong Bigman hemia ol man we oli no bilif long Jisas. Oli bin baptaes, mo oli stap go long jos, mo oli stap mekem ol fasin olsem ol tru man blong Bigman, be oli stap holem yet ol fasin blong wol. Nao oli stap tingting se hemia nao gudfala fasin, be nogat. Olgeta ia oli traem blong folem tufala rod ia wantaem, be fasin ia i no stret. Olgeta ia oli stap giaman long ol man, mo nogud ples we oli go long hem nao yutufala i stap luk.”

Oli luk ples ia finis nao oli wokbaot i go klaem long wan narafala hil we oli singaotem *Klia Hil*. Nao ol man blong lukaot long ol sipsip oli talem long Kristen mo *Wet Long God* se, “Yutufala i kam luk. Putum spaeglas ia klosap long ae mo lukluk i go, bae yu luk wan ples we i naes we i naes.

Mo ples ia hem i Heven. Heven i stap longwe lelebet, be taem we yu putum spaeglas bae yu luk se i klosap.”

Nao tufala i tingting plante long ol samting we ol man blong lukaot long ol sipsip i soem, i mekem han blong tufala i seksek mo tufala i no save lukluk Heven klia gud. (1 Korin 13:12) Be tufala i luk fanis mo get blong ples blong God mo tu tufala i luk wan laet i stap saen longwe.

Ol man blong lukaot long ol sipsip oli soem ol samting finis, nao tufala i rere blong lego ples ia. Mo fas man we nem blong hem, *Save*, hem i givim wan map blong i soem rod long tufala. Mo narafala man, we nem blong hem *Stanap Strong*, i talem se, “Yutufala i lukaot long wan man, nem blong hem *Giaman Man*, from i nogud bae yutufala i letem hem i switim yutufala.”

Nao namba tri man we nem blong hem *Stret Fasin*, hem i joenem toktok i go, hem i talem se, “Mo meksua se yutufala i no slip long wan ples we oli singaotem *Nakaemas*, from sipos yutufala i slip long hem, bae yutufala i no moa save girap bakegen.”

Mo las man we nem blong hem *Ae i Open*, hem i prea i go long God blong i lukaotem gud tufala long wokbaot blong tufala.

## 24 *Lusum Hed* i wantem go long Heven

Nao Kristen mo *Wet Long God* tufala i gobak daon long hil. Mo long stamba blong hil long raethan saed i gat wan vilej i stap, we oli singaotem *Tingbaot Mi Wan*. Mo tufala i luk wan yangfala man we hem i stanap long ples we

rod blong vilej i joenem *Stret Rod*. Nem blong hem *Lusum Hed*. Man ia i bin aot long ples ia *Tingbaot Mi Wan* i kam stanap i stap. Man ia hem i no save tru toktok blong God, be hem i ting se hem i waes mo i save evri samting.

*Lusum Hed* i no tingting blong pas long smol doa long fanis blong joenem *Stret Rod*. Be hem i wantem blong folem tingting blong hem wan nomo, blong traem blong kam long *Stret Rod*. Hem i no save long fasin blong bilif long Jisas mo jenisim laef mo folem stret fasin. Hem i ting se hem i save evri samting.

Kristen mo *Wet Long God* i wantem talemaot sam gudfala toktok long hem, be hem i no wantem harem. Tingting blong hem ia i mekem se hem i wokbaot sloslo nomo biae long tufala. Kristen wetem *Wet Long God* i kam kamaot long wan hil we i gat wan ston wetem wan bigfala



*Lusum Hed i no wantem lisiin long ol tru toktok blong God*

hol i stap long hem. Long ples ia i gat fulap tri, i mekem se san i no stap saen gud long ples ia, mo ples i tudak.

Nao i gat wan man i stap long ples ia. Hem i bin harem nogud from sin blong hem, be hem i no bilif long Jisas. From we hem i stap olsem, i gat seven rabis spirit oli bin tekem seven rop mo oli fasem man ia long hem. (Matiu 12:45) Oli spirit ia oli tekem man ia mo oli putum hem long hol blong ston ia, nao hem i no moa save kamaot long hol ia. Nem blong man ia hem i *Nogat Bilif Nating* mo nem blong ples blong hem, hem i *Lego Bilif*.

Taem we tufala i luk man ia, tufala i sek. Afta tufala i luk wan man bakegen nem blong hem *Bilif Smol*. Be i gat trifala man nogud oli kam blong kilim man ia. Be wan man we nem blong hem, *Gat Sore*, we i blong ples ia *Tru Bilif*, hem i kam nao i ronemaot trifala man nogud ia.

## **25** *Giaman Man i putum tufala long kalabus*

Kristen mo *Wet Long God* i wokbaot i go be *Lusum Hed* i biaen long tufala. Nao oli kam long wan ples we i gat tu rod long hem. Tufala i luk tufala rod ia, be tufala i no save wanem rod nao bae tufala i folem. Nao tufala i stanap i stap, mo wan man i kam we i werem waet klos, i askem long tufala se, “Be from wanem yutufala i stanap i stap long ples ia?”

Afta hem i toktok i talem se, “Yutufala i folem mi. From mi tu mi stap wokbaot i go long Heven.” Nao tufala i folem man ia. Be rod we oli go long hem i kruked mo i tanem i go bak,



mekem se tufala i no moa luk Heven. Rod ia i stap go long wan ples we oli singaotem *Nakaemas*.

Lastaem finis man we i werem waet klos ia i bin digim wan bigfala hol we i krosem rod ia, be ol man oli no save luk hol ia, from we man ia i bin kavremap long ol stik mo ol lif. Man ia i mekem hol blong trikim ol man blong oli foldaon long hem. (Matiu 7:15)

Nao long taem we Kristen mo *Wet Long God* i folem man ia, tufala i wokbaot antap long ol lif mo semtaem tufala i foldaon i go daon. Tufala i foldaon i go long hol ia mo semtaem waet klos blong man ia i lus mo tufala i luksave se man ia hem i wan wokman blong Setan. Tufala i stap insaed long hol mo stap singaot bigwan, be tufala i no save kamaot long hol ia.

Nao Kristen i talem long *Wet Long God* se, “Ol man blong lukaot long ol sipsip oli bin wonem gud yumitu long *Giaman Man* ia. Mo naoia yumitu save se ol toktok blong olgeta i tru.”

Afta, wan enjel i kam luk Kristen mo *Wet Long God* long hol blong *Giaman Man*. Mo enjel ia i pulum tufala i kam antap. Nao i talem se, “Man we yutufala i bin folem, hem i wan man blong giaman. Evritaem hem i stap mekem fasin ia blong giaman long ol man. Hem i jenisim fasin blong hem blong hem i luk olsem wan wokman blong Kraes, be fasin blong hem i no stret. Be yutufala i no sud sapraes long samting ia, from we yumi save se Setan tu i save jenisim lukluk blong hem blong i kam olsem wan enjel blong laet.” (2 Korin 11:13-15)

Nao enjel i tokstrong long tufala, blong tufala i luksave rong blong tufala. Hem i talem long tufala se, “Yutufala i folem mi blong yutufala i wokbaot long *Stret Rod* bakegen.” (2 Kronikel 6:26-27, Hibrus 12:5-6)

Biaen wan man i kam mitim Kristen mo *Wet Long God*. Nem blong hem, *Nogat Bilif*. Nao i askem long tufala se, “Ei, yutufala i stap go wea?”

Be Kristen i talem se, “Mitufala i stap go long Heven.”


Taem *Nogat Bilif* i harem tok ia hem i laf we i laf. Afta i toktok i talem se, “Long wol ia i no gat wan ples nating olsem we yu talem.”

Be Kristen i talem se, “Si, i tru se Heven i stap, be Heven i no kam fulwan yet. Be bae i kam.”

Be *Nogat Bilif* i talem se, “Longtaem mi bin stap lukaotem ples ia be mi no faenem. (Proveb 16:25) Mi bin lego tingting blong wol ia be naoia mi stap gobak long ol samting ia. Long lukluk blong mi, i nogat presen blong man we i bilif.”

Afta, Kristen mo *Wet Long God* i luk i go long tufala ae blong *Nogat Bilif*, mo tufala i luk se tufala ae blong hem i nogud. Hem i blaen from we giaman god blong wol ia i bin mekem man ia i blaen olsem. Tufala i tingting plante se tufala i no wantem folem hem. Mekem se tufala i lego hem, mo tufala i folem rod i go.

Tufala i wokbaot i go mo kasem ples ia we oli singaotem *Ples Nakaemas*. Tufala i sidaon blong spel smol mo paoa blong nakaemas i mekem tufala i wantem slip. Be Kristen i talem se, “Yumi mas tingbaot ol toktok blong ol man we oli stap lukaotem ol sipsip. Oli bin talem se yumitu mas lukaot



*Nogat Bilif i laf long tufala*

long ples ia mo tu oli talem se yumitu no mas slip. Ae blong yumitu i mas open, mo tingting blong yumitu i mas klia.” (1 Tesalonaeka 5:6) Ale, Kristen i toktok plante long ol samting we God i bin mekem bifo, i mekem tufala i no slip.

Nao tufala i aot mo go, be *Lusum Hed* tu i stap wokbaot biae long tufala nao i kam klosap long tufala bakegen. Afta Kristen i talem long hem se, “Yu kam, yumi wokbaot. Be from wanem yu stap wokbaot biae long mitufala?”

Be *Lusum Hed* i talem se, “From mi wantem wokbaot olsem ia. Mi laekem blong stap wokbaot mi wan.”

Afta, Kristen i talem se, “Fasin we yu stap mekem ia i gud long fes blong God o i nogud?”

Be hem i talem se, “Be wanem nao tingting blong yu? From tingting mo hat mo laef blong mi hem i gud nomo. Mo tu mi stap folem evri loa blong God.”

Be Kristen i talem long hem se, “I no olsemia tu. From Baebol i talem se i no gat wan man we i stret gud, nogat. (Rom 3:10) Be from we nem blong yu hem i *Lusum Hed*, i mekem se tingting blong yu i no stret, from yu yu no save stret fasin blong Kraes. Mo yu no save wanem kaen fasin man i sud mekem blong soemaot se hem i bilif long Jisas.”

Afta *Lusum Hed* i talem se, “Hat blong mi i no doti! Mo bilif blong yu mo bilif blong mi i klosap semak, be bilif blong yu i no save winim bilif blong mi.

Afta Kristen i talem long hem se, “Ei, be yu ia, bilif blong yu i stap nomo long tingting blong yu, be yu no save huia Jisas Kraes. Mo kaen bilif we yu yu gat i no save sevem yu. Be God nomo i save openem tingting blong yu, blong yu save bilif long Jisas mo yu save kasem laef. (Jon 6:37) Mo naoia yu mas luk save ol sin long laef blong yu, mo yu mas go hariap long Jisas mo yu bilif long hem. Sipos yu bilif long Jisas, bae hem i fogivim ol sin blong yu, mo bae hem i soemaot long yu ol stret fasin blong yu folem.”

Kristen i toktok olsem afta i wokbaot hariap i go fastaem.

Afta *Lusum Hed* i talem se, “Ei, yu stap wokbaot hariap tumas, be mi no save wokbaot hariap olsem yu. I oraet, yu go fastaem. Bae mi wan nomo, mi wokbaot sloslo i kam biae.”

## 26 Tufala i kam long wan ples; *Klosap Nao*

Kristen mo *Wet Long God* i bitim *Ples Nakaemas* mo tufala i kam long wan ples we oli singaotem *Klosap Nao*. Ples ia i gud we i gud, from we i klosap long Heven. Fulap defren pijin i stap mekem noes nao tufala i stap lisiin long olgeta. Mo tufala i stap lukluk ol defdefren flaoa we oli kalakala gud. Long ples ia san i saen oltaem nomo. Nao tufala i wokbaot i go klosap moa long Heven. I gat fulap enjel i stap insaed long gudfala ples ia. Mo long ples ia ol gudfala samting blong Heven i stap. Ol man oli no save hanggri mo tu oli no save kolkol mo skin i no save kasem kil blong i mekem man i harem nogud. Long ples ia ol man oli no sot long wan samting.

Tufala i wokbaot i kam mo luk fanis blong Heven. Fanis ia oli wokem long wan gudfala ston, mo rod i gat gol long hem. Ol man oli stap wokbaot long gudfala rod ia blong go long Heven, we leg blong olgeta i no save soa.

Nao tufala i harem wan enjel i toktok i se, “God i bin karem bak yutufala blong bae hem i givim presen long yutufala from ol wok we yutufala i bin mekem.” (Revelesen 22:12)

Taem tufala i stap kam klosap moa long Heven, tufala i luk ol defdefren naes samting i stap long wan bigfala garen. Long garen ia i gat fulap kakae i stap, mo tu ol tri oli karem fulap bigfala frut. Tufala i luk wan man we i stap lukaotem garen ia mo tufala i askem long man ia se, “Be garen ia blong huia?”

Afta man ia i talem se, “Garen ia hem i blong King blong yumi, *Bigman*. Hem i mekem garen ia blong ol man blong ol



*Tufala i kam kasem Garen Blong Bigman mo tufala i glad tumas*

defren ples we oli folem *Stret Rod* ia oli kam mo kakae long hem.”

Mo man blong lukaotem garen i karem Kristen mo *Wet Long God* mo oli go insaed long garen ia, afta hem i talem se, “Wanem samting we yutufala i luk mo laekem, yutufala i save karem mo kakae, olsem we yutufala i wantem.”

Man ia i tekem tufala i go long wan ples blong oli sidaon mo gudfala win i blu mo tu oli dring wota. Taem we tufala i luk ol samting ia, tufala i harem gud tumas. Afta we tufala i kakae, tufala i slip.

Taem tufala i girap, tufala i aot mo wokbaot bakegen long *Stret Rod*. Mo tufala i luk Heven i stap mo san i stap saen long ol gol long Heven i mekem ples i laet bigwan long ae blong tufala. I mekem tufala i no save lukluk gud. (2 Kron 3:18, Revelesen 21)

Afta, Kristen wetem *Wet Long God* i folem rod mo tu enjel i wokbaot i kam mo luk tufala. Klos mo fes blong tufala enjel ia i saen. Nao tufala i askem long Kristen mo *Wet Long God* se, “Yutufala i bin aot wea ia mo kam?”

Afta we Kristen i givim ansa blong hem, tufala enjel i talem long hem se, “Bae i no longtaem yutufala i kasem Heven. Be yutufala i no save go insaed long Heven naoia. Bae yutufala i mas krosem wan bigfala reva blong bae yutufala i kasem fanis blong Heven. Taem we yutufala i krosem reva finis, ale bae yutufala i jes save go insaed long Heven.”

Afta, tufala enjel wetem Kristen mo *Wet Long God* i go klosap moa mo oli luk fanis blong Heven mo doa blong go insaed long Heven.

## **27** Kristen wetem *Wet Long God* i go long Heven.

Kristen mo *Wet Long God* i wokbaot i go smol nao oli luk bigfala reva ia. Nem blong reva ia hem i *Reva blong Ded*.

Reva ia i dip mo i nogat rod i gokros. Mo taem we tufala i luk bigfala reva ia tufala i fraet tumas, be tufala enjel i talem long tufala se, “Sipos yutufala i no krosem reva ia bae yutufala i no save go insaed long Heven.”

Afta, Kristen wetem *Wet Long God*, i wantem tumas blong go long Heven, mekem se tufala i go nomo blong krosem reva. Tufala i stap wokbaot gokros long reva, nao tufala i fraet tumas. Kristen i stap dring wota gogo i stap



*Tufala i krosem Reva blong Ded*



draon nao, afta hem i singaotem fren blong hem *Wet Long God*, i talem se, “Awe, ating bae mi ded long reva ia!”

Be *Wet Long God* i talem se, “Brata, yu no fraet! Mi mi stap stanap yet long ol ston aninit long wota ia. Yu tu, yu save stanap yet blong yu no draon.”

Nao Kristen i talem long hem se, “Sore tumas fren blong mi, fraet blong mi i olsem wan hevi samting we i pusum mi mi go daon blong mi draon. From samting ia, ating mi no save kasem gudfala ples.”

Kristen i fraet tumas from hem i stap tingting se naoya bae hem i ded. Tingting blong hem i spolem hem, i mekem hem i no moa tingbaot sore blong God mo pis we God i wantem givim long hem.

Be *Wet Long God* i no wantem se bae Kristen i dring wota mo i ded, afta i holem hed blong Kristen blong i stap antap long wota blong hem i no draon. Be paoa blong Kristen i no moa gat, hem i slak we i slak. Afta *Wet Long God* i singaot se, “Ei, Kristen yu lisiin! Jisas Kraes i mekem yu yu oraet finis.” (Ol Wok 9:34)

Taem Kristen i harem toktok ia, paoa i kambak long hem mo i harem se wota i no dip tumas, mo hem i save stap stanap long ol ston, ale tufala i stanap gud, nao tufala i wokbaot i go blong krosemgud reva ia. (Aesea 43:2)

Tufala i krosem reva mo kasem narasaed, mo tufala enjel i stap wet long tufala. Enjel i sekhan wetem Kristen mo *Wet Long God*. Afta hem i talem se, “God i sanem mitufala i kam blong helpem yutufala blong go long ples blong hem.” (Hibrus 1:14)


Heven hem i wan bigfala taon we i stap antap long wan hil. Be tufala i no hadwok blong go antap long hil ia from we tufala enjel i tekem tufala i go.

Afta Kristen wetem *Wet Long God* i kam klosap long doa blong Heven. I gat taosen mo taosen enjel i kam blong sekhan long tufala. (Hibrus 12:22-24) Mo tufala enjel we i bin karem tufala i kam i talem long ol narafala enjel se, “Taem we tufala man ia i stap long wol tufala i lavem Jisas bigwan long hat blong tufala. Tufala i lego ol samting blong wol ia mo folem *Stret Rod* blong kasem ples blong God.” (1 Tesalonaeka 4:13-17)

Sam enjel oli kam blu long ol bubu, mo sam oli mekem ol gudgudfala miusik long gita. Ol miusik ia i mekem Kristen mo *Wet Long God* i harem gud tumas, from we tufala i win finis mo naoia tufala i kasem Heven finis.

Kristen wetem *Wet Long God* i go kasem stret long doa blong go insaed long Heven, nao tufala enjel i talem long tufala se, “Ale, naoia yutufala i singaot bigwan.”

Mo taem tufala i singaot, *Inok* mo *Moses* mo *Elaeja* trifala



*Enjel i blu long bubu.*

i kam long fanis mo luk Kristen mo *Wet Long God*.

Nao Enjel i talem long *Inok*, *Moses* mo *Elaeja* se, “Tufala man ia i lavem tumas King blong yumi, mo tufala i kam longwe blong kam stap wetem hem. Fastaem tufala i bin kam long kros, nao sin blong tufala i no moa gat, mo wan enjel i bin givim wanwan smol buk long tufala.



*Kristen mo Wet Long God i singsing blong Presem  
Nem blong God*

Afta tufala i givim smol buk ia i go long enjel ia blong hem i lidim tufala i go insaed long fanis. Enjel i karem smol buk ia mo i go givim long King. Taem King i luk smol buk ia hem i talem se, “Tufala man ia i stap wea?”

Enjel i talem se, “Tufala i stap aotsaed long fanis yet.”

Ale King i talem se, “Openem doa mo tekem tufala man ia i kam insaed.” (Revelesen 22:14)

Kristen mo *Wet Long God* i go insaed, mo semtaem bodi blong tufala i jenis. I kam olsem bodi we i stret wan blong stap long Heven mo i saen we i saen. Mo klos blong tufala tu i saen semak long laet blong Heven. Ol enjel oli givim gita long tufala mo tufala i glad tumas mo tufala i stap plei.

Ol enjel oli givim wan spesel hat blong putum long hed blong tufala blong soemaot se tufala i win. Mo ol man long Heven oli singsingaot bigwan from we oli harem gud tumas we tufala ia i bin kam insaed long Heven blong stap wetem God.

Afta wan Enjel i toktok i talem se, “Yutufala i kam presem God blong yumi.” (Matiu 25:23) Nao Kristen mo *Wet Long God* i singsing blong leftemap nem blong God from we hem i tekembak tufala. Tufala i singsing long singsing ia:

“Presem Nem blong Hae God, we yu nao yu sidaon long jea blong King. Yu yu gat olgeta paoa. I stret nomo blong olgeta man i talem tangkiu long yu, mo i stret nomo blong ol man oli leftemap nem blong yu, mo i stret nomo blong ol man oli givim ona long yu, gogo i no save finis.” (Revelesen 5:13)

Tufala man i kam insaed finis, ale, sam long ol enjel oli sarem doa blong fanis bakegen.

## **28** *Lusum Hed* i no save go long Heven

Nao *Lusum Hed* i kasem *Reva blong Ded*. Mo hem i no bin hadwok blong krosem reva. Nogat! From wan kapten blong bot, we nem blong hem *No Stap Wet*, i kam tekem *Lusum Hed* long bot mo sakem hem narasaed reva.

*Lusum Hed* i go mo kamaot long fanis blong Heven, hem wan nomo. I no gat wan enjel i tekem hem i kam long rod. Mo i no gat man i sekhan long hem.

Nao *Lusum Hed* i kilkilim doa mo *Moses* wetem wan narafala man i kam luk hem mo oli askem long hem se, “Be yu yu kam wea ia? Mo yu wantem wanem?”

Afta *Lusum Hed* i talem se, “Mi bin kakae mo dring wetem King, mo hem i bin tijim mi.” (Luk 13:26)

Oli askem *Lusum Hed* se, “Smol buk we enjel i givim long yu i stap wea?”


Nao *Lusum Hed* i pusum han blong hem i go long poket, be i no gat wan smol buk. Mo taem we King i harem, nao i talem long enjel ia se, “Fasem leg mo han blong hem mo tekem hem i go.” (Matiu 8:12)

Oi enjel oli holemtaet hem mo karem hem i go aotsaed long fanis mo sakem hem i go long hol ia we hem i Hel.

## **Afta we Jon Banyan i drim, hem i raetem toktok olsem.**

Ale mi bin stori long yufala long drim blong mi. Mo yufala i mas skelemgud drim ia. Ol toktok ia i save givhan long yumi wanwan. I gat fulap pija tok blong tijim yufala. Yufala i mas letem God i lidim yufala long wokbaot blong yufala long rod blong go long Heven olsem we Kristen i bin mekem.

I nogud yufala i lego *Stret Rod* mo folem *Nogud Rod*. Mo tu, i nogud yufala i ting se yufala i stap folem *Stret Rod*, be Setan i save trikim yufala nao bae yufala i lus. Be sipos yufala i lavem God mo wantem biae long hem, bae stori ia i save givhan bigwan blong bilif blong yufala i kam strong. Mo bae yufala i save glad tumas long paoa mo sore blong God. Mo God bae i blesem yufala evriwan.



## **Hemia wan lis blong ol man we Kristen i bin mitim olgeta long wokbaot blong hem:**

Ivanjelis, Stronghed, Sofsof, Givhan, Bigman, Man blong Wol, Folem Loa, Tok Kwaet, Gudfala Hat, Talem Tok, Kasem Hariap, Save Wet, Ston Hed, Les Man, Stap Nating, Kristen Long Maot, Kristen Long Skin, Fraet Smol, No Trastem Man, Lukaot Gud, Sina Man, Waes, Gudfala Tingting, Gudfala Wok, Gud Tumas, Holem Taet Bilif, Spolem Man, Strong Bilif, Enemi, Woman Long Rod, Olfala Tingting, Hae Tingting, Kavetem, Tingting i Antap, Jisas, Moses, No Glad, Sem, Toktok Tumas, Swit Maot, Bielsebul / Setan, Kaon, Danis, Mekem Ofa, Polis, Nogud Tingting, Hiten Man, Devel Man, Posen Man, Brokem Lo, Fasin Tudak, Tok Flas, Laekem Tudak, Hambag, Wet long God, Mane, Karem Samting, Lukaotem Samting, Karem Mane, Man Blong Kros, Dimas, Giaman Bilif, Meksave Man, Nogat Sore, Save, Stanap Strong, Stret Fasin, Ae i Open, Giaman Man, Lusum Hed, Nogat Bilif Nating, Bilif Smol, Gat Sore, Nogat Bilif, Ol Enjel, Inok, Moses, Elaeja, King / God, No Stap Wet.

## **Hemia wan lis blong ol ples we Kristen i bin kasem long wokbaot blong hem:**

Stret Rod, Nogud Ples, Sofmad, Nogud Ples Olgeta, Sidaon Gud, Stap Gud, Haos Blong Ol Enemi, Haos Blong Ol Man Blong Bigman, Karem Bak Yumi, Kalvari, Giaman Glad, Hadwok Hil, Rod Nogud, Rabis Rod, Harem Gud, Hil Blong Harem Gud, Ples Imanuel, Tingting i Stap Daon, Dakbus, Fasin Giaman, Tudak, Swit Toktok, Wantem Mane, Wota We i Stap Laef, Ronwe long Ol Harem Nogud, No Stap Gud, Harem Gud Hil, Mestek Hil, Hil blong Lukaot, Klia Hil, Ples Nakaemas, Tingbaot Mi Wan, Lego Bilif, Klosap Nao, Garen Blong Bigman, Tru Bilif, Reva blong Ded, Heven, Hel.

Electronic edition distributed by Trutok Media  
[www.trutokmedia.com](http://www.trutokmedia.com)

